

四庫全書

史部

欽定四庫全書

史部

山東通志卷三十五之一上

詳校官監察御史_臣劉湄

檢討_臣德生覆勘

總校官知縣_臣繆琪

校對官助教_臣卜維吉

謄錄監生_臣袁瑩

欽定四庫全書

山東通志卷三十五之上

藝文志

闕里六藝天下之大文在焉學如子輿氏猶曰遊
於聖人之門者難為言況餘子乎然而文明化洽
與時代興道源徵心法之同治法昭因革之美即
極之流連品物憑弔古今亦皆以導性情而抒懷
抱雖連篇屢牘純疵互陳要惟本典訓以折衷之

則周禮盡在魯矣爰取舊編加之釐訂疆圉則範而不濫義類則秩而不淆迺增迺刪歸于大雅覽歷朝之制作河嶽常靈覲

昭代之文明奎婁有耀則揆歷原本何莫非六藝之芳潤哉作藝文志

藝文志一

藝文總目

詩賦表疏箋啟序贊頌碑箴銘論議說文

各體為五帙各以時代為先後凡屬藝文俱準此例

樂府

四言附

虞舜思親操

陟彼歷山兮崔嵬有鳥翔兮高飛瞻彼鳩兮徘徊河水
洋洋兮清冷深谷鳥鳴兮嚶嚶設置張罟兮思我父母
力耕日與月兮往如馳父母遠兮吾將安歸

黃鵠歌

魯女陶嬰作

悲夫黃鵠之早寡兮七年不雙宛頸獨宿兮不與衆同
夜半悲鳴兮想其故雄天命早寡兮獨宿何傷寡婦念

此兮泣下數行嗚呼哀哉兮死者不可忘飛鳥尚然兮
況於貞良雖有賢雄兮終不同行

女貞木辭

魯貞女作

菁菁茂木隱獨榮兮變化垂枝含蕤英兮修身養志建
令名兮厥道不同善惡并兮屈躬就濁世疑清兮懷忠
見疑何貪生兮

引聲歌

周莊周

天地之道近在胸臆呼喻精神以養九德渴不求飲饑

不索食處世守道志潔如玉卿相之位難可直當巖巖
之石幽而且涼枕塊寢處樂在其央寒涼回固可以久
長

飯牛歌三首

周甯戚

南山斫白石爛生不逢堯與舜禪短布單衣適至骭從
昏飯牛薄夜半長夜漫漫何時旦

滄浪之水白石粲中有鯉魚長尺半敝布單衣裁至骭
清朝飯牛至夜半黃犢上坂且休息吾將捨汝相齊國

出東門兮厲石班上有松栢青且闌麤布衣兮緼縷時
不過兮堯舜主牛兮努力食細草大臣在爾側吾當與
爾適楚國

瓠子歌二首

漢武帝

瓠子決兮將奈何浩浩洋洋兮慮殫為河殫為河兮地
不得寧功無已時兮吾山平吾山平兮鉅野溢魚沸鬱
兮栢冬日延道弛兮離常流蛟龍騁兮放遠遊歸舊川
兮神哉沛不封禪兮安知外為我謂河伯兮何不仁泛

濫不止兮愁吾人
齧桑浮兮淮泗滿
久不返兮水維緩
河湯湯兮激潏潏
北渡迴兮迅流難
蹇長菱兮沉美玉
河伯許兮薪不屬
薪不屬兮衛人罪
燒蕭條兮噫乎何
以禦水隕林竹兮
捷石菑宣房塞兮
萬福來

平陵東

王莽篡漢丞相翟方進少子義時為濟守
舉兵不克見劫殺其門人作平陵東歌哀

之

漢樂府

平陵東松栢桐不知何人刳
義公刳義公在高堂下交
錢百萬兩去馬兩去馬亦誠
難顧見追吏心中惻心中

惻血出漉歸告我家賣黃犢

梁父吟

漢諸葛亮

步出齊城門遙望蕩陰里
里中有三墓累累正相似
問是誰家墓田疆古冶子
力能排南山文能絕地紀
一朝被讒言二桃殺三士
誰能為此謀相國齊晏子

飛龍篇

魏曹植

晨遊泰山雲霧窈窕忽逢二童
顏色鮮好乘彼白鹿手翳芝草
我知真人長跪問道西登玉堂
金樓複道授我

仙藥神皇所造教我服食還精補腦壽同金石永世難
老

驅車篇

魏
曹植

驅車揮駕馬東到奉高城神哉彼泰山五岳專其名隆
高貫雲蜺嵯峨出太清周流二六堦間置一二亭上有
湧醴泉玉石揚華英東北望吳野西眺觀日精魂神所
繫屬逝者感斯征王者以歸天效厥元功成歷代無不
遵禮記有品程探策或長短唯德享利貞封者七十帝

軒皇元獨靈
飡霞漱沆瀣
毛羽被身形
發舉蹈虛廓
徑庭升窈冥
同壽東父年
曠代永長生

仙人篇

魏曹植

仙人攬六著
對博泰山隅
湘娥拊琴瑟
秦女吹笙竽
玉樽盈桂酒
河伯獻神魚
四海一何局
九州安所如
韓終與王喬
要我於天衢
萬里不足步
輕舉凌太虛
飛騰踰景雲
高風吹我軀
迴駕觀紫微
與帝合靈符
閭闔正嵯嵯
雙闕萬丈餘
玉樹扶道生
白虎夾門樞
驅風游四海

東過王母廬俯觀五嶽間人生如寄居潛光養羽翼進趨且徐徐不見軒轅氏乘龍出鼎湖徘徊九天上與爾長相須

靈芝篇

魏曹植

董永遭家貧父老財無遺舉假以供養傭作致甘肥債家填門至不知何用歸天靈感至德神女為秉機

齊謳行

晉陸機

營丘負海曲沃野爽且平洪川控河濟崇山入高冥東

被姑尤側南界聊攝城海物錯萬類陸產尚千名孟諸
吞楚澤百二倖秦京惟師恢東表桓后定周傾天道有
迭代人道無久盈鄙哉牛山歎未及至人情爽鳩苟已
徂吾子安得停行行將復去長存非所營

梁父吟

晉陸機

玉衡既已驂羲和若飛凌四運循環轉寒暑自相懲冉
冉年時暮迢迢天路徵招搖東北指大火西南升悲風
無絕響玄雲互相仍豐水憑川結霜露彌天凝年命時

相逝慶雲鮮克乘履信多愆期思順焉足憑愜愜臨川
響非此孰為興哀吟梁甫巔慷慨獨撫膺

秋胡行

晉傅奕

秋胡子娶婦三日會行仕宦既享顯爵保茲德音以祿
頤親韞此黃金覩一好婦採桑路傍遂下黃金誘以逢
卿玉磨逾潔蘭動彌馨源流潔清水無濁波奈何秋胡
中道懷邪美此節婦高行巍哉哀哉可愍自投長河

秋胡行

晉傅玄

秋胡納令室五日宦他鄉皎皎潔婦姿冷冷守空房燕
婉不終夕別如參與商憂來猶四海易感難可防人言
生日短愁者苦夜長百草揚春華攘腕采柔桑素手尋
繁枝落葉不盈筐羅衣翳玉體迴目流彩章君子倦任
歸車馬如龍驤精誠馳萬里既至兩相忘行人悅令色
借息此路傍諺以逢卿喻遂下黃金裝烈烈貞女念言
辭厲秋霜長驅及居室奉金升北堂母立呼婦來歡情
樂未央秋胡見此婦惕然懷探湯負心豈不慚永誓非

所望清濁自異源鳬鳳不並翔引身赴長流果哉潔婦
腸彼夫既不淑此婦亦太剛

泰山吟

宋謝靈運

岱宗秀維嶽崔嵬刺雲天峩嶸既險巇觸石輒芊綿登
封瘞崇壇降禪藏肅然石間何晻靄明堂秘靈篇

秋胡妻詩

宋顏延之

椅梧傾高鳳寒谷待鳴律影響豈不懷自遠每相匹婉
彼幽閒女作嬪君子室峻節貫秋霜明豔侔朝日嘉運

既我從欣願自此畢

燕居未及歡良人顧有違脫巾千里外結綬登王畿戒
徒在昧旦左右來相依驅車出郊郭行路正逶遲存為
久離別歿為長不歸

嗟余怨行役三陟窮晨暮嚴駕越風寒解鞍犯霜露原
隰多悲涼迴飈卷高樹離獸起荒蹊驚鳥縱橫去悲哉
游宦子勞此山川路

迢遙行人遠宛轉年運徂良時為此別日月方向除孰

知寒暑積僊俛見榮枯歲暮臨空房涼風起坐隅寢興
日已寒白露生庭蕪

勤役從歸願反路遵山河昔辭秋未素今也歲載華蠶
月觀時暇桑野多經過佳人從所務窈窕援高柯傾城
誰不顧弭節停中阿

年往誠思勞路遠濶音形雖云五載別相與昧平生捨
車遵往路鳬藻馳目成南金豈不重聊自意所輕義心
多苦調密比金石聲

高節難久淹竭來空復辭遲遲前途盡依依造門基上
堂拜嘉慶入室問何之日暮行采歸物色桑榆時美人
望昏至慚嘆前相持

有懷誰能已聊用申苦難離居殊年載一別阻河關春
來無時豫秋至恒早寒明發動愁心閨中起長嘆慘悽
歲方晏日落游子顏

高張生絕絃聲急由調起自昔枉光塵結言固終始如
何久為別百行愆諸已君子失明時誰與偕沒齒愧彼

行露詩甘之長川記

東武吟

宋鮑照

主人且勿喧賤子歌一言僕本寒鄉士出身蒙漢恩始
隨張校尉占募到河源後逐李輕車追兵窮塞垣密途
巨萬里寧歲猶七奔筋力盡鞍甲心思歷涼溫將軍既
下世部曲亦罕存時事一朝異孤績誰復論少壯辭家
去窮老還入門腰鎌刈葵藿倚仗牧雞豚昔如韝上鷹
今似檻中猿徒結千載恨空負百年怨棄席思君幄疲

馬戀君軒願垂晉主惠不愧田子魂

秋胡妻詩

齊王融

日月共為照松筠俱以貞佩芬甘自遠結鏡待君明且
協金蘭好方愉琴瑟情佳人忽千里幽閨積思生

景落中軒坐悠悠望城闕高樹升夕煙層樓滿初月光
陰非或異山川屢難越輟泣拚鉛姿搔首亂雲髮
傾魄屬徂火搖念待方秋涼氣承宇結明熠燿堦流三
星亦虛暎四屋慘多愁思君如萱草一見乃忘憂

杼軸鬱不諧契闊彌新故朔風欄上發寒鳥林間度客
遠乏衣裘歲晏饒霜露參差興別緒依遲起離慕
願言如可信行邁亦云返睇景不告勞瞻途寧遽遠何
以淹歸轍蠶妾事春晚送目亂前華馳心迷舊婉
椒珮客有結振芳岐路隅黃金徒以賦白珪終不渝
心良自皎安用久踟躕遡車及枌巷流日下西虞
披帷惕有忘出門遲所欲彼美後來儀慙顏變欣矚蘭
艾隔芳臭涇渭分清濁去去天人子請殉川之曲

齊歌行

齊陸厥

黃金徒滿贏不如守章句雪宮紛多士稷下岌成露同
載雙連珠合席懸河注垂幃五行下操筆百金賦華屋
大車方高門駟馬駐玄豹空不食南山隱雲霧

齊謳行

梁沈約

東秦稱古地川隰固夷昶層峰駕蒼雲濁河流素壤青
邱良杳鬱淄宮信疏敞王佐改殷命霸功繆周綱

梁父吟

梁沈約

龍駕有馳策日御不停陰星籥亟迴變氣化坐盈侵寒
光稍渺渺秋塞日沈沈高牕灰餘火傾河駕騰參飈風
折暮草驚籜隕層林時雲靄空遠淵水結清深奔樞豈
易細珠庭不可臨懷仁每多意履順孰能禁露清一唯
促緩志且移心高歌步梁父歎絕有遺音

魚山神女歌

唐王維

坎坎擊鼓魚山之下吹洞簫望極浦女巫進紛屢舞陳
瑶席湛清醑風淒淒又夜雨不知神之來兮不來使我

心兮苦復苦

紛進舞兮堂前目眷眷兮瓊筵來不言兮意不傳作暮
雨兮愁空山悲急管兮思繁弦神之駕兮儼欲旋倏雲
收兮雨歇山青青兮潺湲

東海有勇婦行

唐李 白

梁山感杞妻慟哭為之傾金石忽輒開都由激深情東
海有勇婦何慙蘇子卿學劍越處子超騰若流星捐軀
報夫讐萬死不願生白刃耀素雪蒼天感精誠十步兩

躑躑三呼一交兵斬首掉國門蹴踏五藏行割此伉儷
憤粲然大義明北海李使君飛章奏天庭捨罪警風俗
流芳播滄瀛志在列女籍竹帛已光榮淳于免詔獄漢
主為緹縈津妾一棹歌脫父于嚴刑有子若不肖不如
一女英豫讓斬空衣有心竟無成要離殺慶忌壯夫素
所輕妻子亦何辜焚之買虛名豈如東海婦事立獨揚
名

秋胡妻

唐
高適

妾本邯鄲未嫁時容華倚翠人未知一朝結髮從君子
將妾迢迢東魯陞時逢大道無艱阻君方遊宦從陳汝
蕙樓獨卧頻度春彩閣辭君幾徂暑三月垂楊蠶未眠
攜籠結侶南陌邊道逢行子不相識贈妾黃金買少年
妾家夫壻經離久寸心誓與長相守願言行路莫多情
道妾貞心在人口日暮蠶饑相命歸攜籠端飾來庭闈
勞心苦力終無恨所冀君恩即可依聞說行人已歸止
乃是向來贈金子相看顏色不復言相顧懷慙有何已

從來自隱無疑背直為君情也相會如何咫尺仍有情
况復迢迢千里外誓將顧恩不顧身念君此日赴河津
莫道向來不得意故欲留規戒後人

海漫漫

唐白居易

海漫漫直下無底傍無邊雲濤煙浪最深處人傳中有
三神山山中多生不死藥服之羽化為天仙秦皇漢武
信此語方士年年採藥去蓬萊今古但聞名煙水茫茫
無覓處海漫漫風浩浩眼穿不見蓬萊島不見蓬萊不

敢歸童男艸女舟中老徐福文成多誑誕上元太一虛
祈禱君看驪山頂上茂陵頭畢竟悲風吹蔓草何況玄
元聖祖五千言不言藥不言仙不言白日升青天

將歸操

唐韓愈

秋之水兮其色幽幽我將濟兮不得其由涉其淺兮石
齧我足乘其深兮龍入我舟我濟而悔兮將安歸尤歸兮歸
兮無與石鬪兮無應龍求

龜山操

唐韓愈

龜之氣兮不能為雨
龜之枿兮不中梁柱
龜之大兮祗以奄魯
知將隕兮哀莫予伍
周公有鬼兮嗟予歸輔

猗蘭操

唐韓愈

蘭之猗猗揚揚其香
不採而佩於蘭何傷
今天之旋其曷為然
我行四方以日以年
雪霜貿貿薺麥之茂
子如不傷我不爾覲
薺麥之茂薺麥之有
君子之傷君子之守

堯廟祀歌

宋鮮于侁

車麟麟兮廟堦鼓坎坎兮河下等琴兮並奏潔時羞兮
虔祠事瑤華為饌兮沆瀣為漿象籩玉豆兮金鼎煌煌
海珍野藪兮雜錯而致誠神之來兮風雨蕭蕭前驅于
畢兮上有招搖羽林為衛兮虹霓為旗鳳凰左右兮擾
伏蛟螭神之降兮金輿靈欣欣兮矜蠻德名兮覆燾千
萬年兮不忘

舜廟祀歌

宋 鮮于侁

道歷山兮逶蛇思古人兮感歎並諸胥兮肅止仰魯雲

兮晻曖獸何鳴兮林中鳥何悲兮山上木何為兮不剪
草何為兮茂暢帝之神兮在天帝之德兮在人物具兮
四海心精兮一純采秀實兮山間摘芳毛兮澗底玉醴
湛兮瓊茅肴脩雜兮蘭茝樂備兮九奏鳳舞兮儀韶人
駿奔兮如在君卒享兮神交

周公廟祀歌

宋 鮮于侁

噫嗟兮文公歸然兮閔宇悵王室兮多難獨勤勞兮左
右四國流言兮冲人不知東征問罪兮惛惛不歸大電

以風兮天威震驚并啟金縢兮袞衣有光公之心兮大
成文武公之子兮建侯啟土山川兮附庸奄鳧繹兮龜
蒙萬子孫兮承祀億兆人兮仰止惟夫子之歎嗟兮不
復見於寤寐何莽新之假攝兮文姦言而欺一世造作
詭故而戕劉兮亦亟殄宗而絕嗣公之聖而德協天兮
何妄人之輒自擬俾其顛而不終兮天實表公衷而警
後肅進拜於廟堂兮宜奉時之牲酒鼓鐘兮在宮琴瑟
兮在堂神之格兮樂享民欣欣兮不忘

孔子廟祀歌

宋 鮮于侁

曲阜兮遺墟先師兮闕里神髣髴兮如在涕潺湲兮不
已窮天地兮一人揭日月而照臨生無萬乘之位兮三
千之徒心服而四來嗟愚陋之不明兮乃商賜之為疑
羌紛紛其妄作兮悖道違義而弗自知顧六藝之折衷
兮取捨縱橫而協于道後世苟輕肆于胸臆兮必遽貽
于詬病三綱立而五教明兮實治世之宏矩履厚地而
戴高天兮胡一日之可捨宜萬齡之廟貌兮春秋不乏

其時祀合仁義以為冠兮結忠信而為佩集道德以為
裳兮服文章而為帶列籩豆為左右兮蘋藻牲牢而潔
肥酌玉醴以為酒兮錯瓊瑤而為粢升堂而北面兮望
冕旒之巍巍惟神明之降鑒兮洞精神其來歆

歸山操

金馬 鈺

能無為兮無不為能無知兮無不知知此道兮誰不為
為此道兮誰復知風蕭蕭兮木葉飛聲嗷嗷兮鴈南歸
嗟人世兮日月催老欲死兮猶貪癡嗟人世兮魂欲飛

傷人世兮心欲摧難可了兮人間非指青山兮當早歸
青山夜兮明月飛青山曉兮明月歸饑餐霞兮渴飲溪
與世隔兮人不知無乎知兮無不為此心滅兮那復疑
天庭忽有雙鶴飛登三宮兮遊紫微

虞帝廟祀歌

元張顗

雷夏澤兮河濱爰禁宮兮安皇靈以陶以漁兮厥居孔
寧山川如故兮有懷古人思親兮知天倫和兄弟兮宜
家人令聞不已兮惟德之純享予肆祀兮萬世不泯崇

基兮言言維松栢兮既堅挺挺兮旅楹神肅然兮來庭
載龍旗兮霓旌廣牡兮殷烝甘醴惟厚兮旨且清籩豆
靜兮苾苾芬芬神其歆兮黍稷非馨錫茲純嘏兮惠式
均貽我來牟兮迄康年九歌一闕兮於薦斯牲 帝子
降兮有媯嬪於虞兮言歸六珈兮副褱玉珮兮陸離親
承兮結褵與君兮一齊翦芳椒兮成居擗蕙蘭兮為帷
諸娣從兮祁祁雝雝肅肅兮左右攸宜內朝退兮委蛇
陪黼座兮晏娛酒香兮牲肥鐘鼓樂兮昭歌問公桑兮

治絲織綖紃兮垂衣相我室家兮福祿是釐九歌再闋
兮右享元妃 館甥二室兮陶唐誰其媵兮女英俁天
妹兮定厥祥有美同居兮志同行製芰荷為衣兮芙蓉
為裳君之袂兮不如娣之袂良掄翟兮葱珩八鸞兮鎗
鎗御彩霓兮來帝旁何為鼓瑟兮流湘南國雖樂兮不
如帝鄉桂棟兮蘭堂蓀壁兮葯房肅祀事兮孔明舉匏
尊兮嘉薦令房獻繭兮承筐朱綠兮玄黃爛昭昭兮黼
黻文章女心傷悲兮祈爾福慶九歌三闋兮媿於娥皇

太白樓祀歌

元陳儼

公昔去兮乘龍宵雲氣兮蓬萊宮襟青霞兮佩明月橫
四海兮焉窮濟水兮無波泰山繚兮鬱嵯峨思故園兮
神游恍臨風兮浩歌醉而生兮醉而死曩孰非兮今孰
是千鍾百榼兮彼且奚適操一瓢兮吉其止寧春風兮
折瓊芳援北斗兮斟桂漿浩冥冥兮徙倚以望歸來歸
來兮舉我觴

孝烈祠祀歌

祀濮州孝子宗顯
章並妻烈婦辛氏

明黃佐

靈鼉逢逢兮老鯨湛椒漿兮列蘭蒸五音飾兮黻繡張
瑱瑤席兮玉英膺蕭炳兮拜以頻琴瑟奏兮雲舞南陔
闕兮柏舟靈不徠兮夷猶驂泰鴻兮燭龍轡慶陰陰兮
靈其有喜儵蕙帶兮荷裳又金支兮翠旗駕鵞翔兮靈
之徠靈徠不徠兮我心悲濮山岷佳兮濮水寥汙高賢
愉愉兮繫孝而烈穆並騁兮盤桓擊桑梓兮涕潺湲象
輿轡兮懔容與靈臨饗兮福我士女矯揚光兮宴娛永
山則兮雲施般姚姚兮裔裔靈何為兮澌然逝褰霧縠

兮窅冥冥山水夕兮含清春有蘭兮秋有菊結無極兮
芳馨

樹中餓弔義城

明 李東陽

山深雪寒路坎坷兩死何如一生可
挑才自信不如哀
君若有功何必我
楚王好事得燕才
燕家未築黃金臺
當時周室何為哉
吁嗟乎樹中餓死
何足惜何似西山
採薇食

秋胡行

明 張士淪

古人貧賤容易居今人貧賤生歎歎古人富貴不苟有
今人富貴方相守陋哉桑下力田言國卿為人詎必賢
皎皎潔婦志靡慝素絲畏染貪夫墨後來有婦不下機
側目長跼黃金歸古人今人乃如此我咏秋胡嗟不已

堯山廟祀歌

明鍾羽正

瞻暉兮朝昕斐亶亶兮崇雲帝之來兮訢訢郁丹彩兮
揚清氛先蜚簾兮肅肅從屏翳兮雯雯霓旌兮螭駕激
灝瀨兮靈鼗肩吾趨兮夷若儼盼蠻兮繽紛迎神
瞻

氲一作熹微

黃收兮焜煌
扈純衣兮垂裳
撫長劍兮流景
曜

玉珥兮凝霜
燕鐔兮代鶚
煥魏鉞兮齊鉞
垣薇兮營繚

霞廡曠兮雲廊
闕星弧兮落妖日
覃熙皞兮為民慶
獻神

進埏鉶兮和羹
奏陶籩兮藉芳
盛星非兮莆蕘
湛玄酎

兮芝英
蜩療兮螭楹
帝之饗兮觀歲
成以風兮以雨
樂

予鑿兮予耕
予安知兮帝力
鉤擊壤兮同聲
送神

猗蘭操

國朝

陳廷敬

猗猗其蘭
迺在空谷
我行四野
奚處奚宿
其蘭猗猗
幽

幽其香雜彼蕃廡我心相羊蘭其如何維霜及霰時節
晚暮不我能見子不我見我心則夷悠哉以老樂天弗
疑

傷槐操

齊景公時禁傷槐靖父衍醉
犯之靖言于晏子後除其禁

方正珙

槐之茂兮青青其枝傷槐者死而醉不知臣既有犯兮
罪且奚辭以樹加人兮非公而私有女曰靖兮造門陳
詞父得不死兮釋者纍纍嗚呼誰謂生女兮不如男兒

四言詩

誡子詩

漢 東方朔

明者處世莫尚于中優哉游哉于道相從首陽為拙柳
惠為工飽食安步以仕代農依隱玩世詭時不逢才盡
身危好名得華有羣累生孤貴失和遺餘不置自盡無
多聖人之道一龍一蛇形見神藏與物變化隨時之宜
無有常家

在鄒詩

漢 韋孟

微微小子既苟且陋豈不牽位穢我王朝王朝肅清唯

俊之庭顧瞻余躬懼穢此征我之退征請於天子天子
我恤矜我髮齒赫赫天子明哲且仁縣車之義以洎小
臣嗟我小子豈不懷土庶我王寤越遷於魯既去禰祖
惟懷惟顧祁祁我徒戴負盈路爰戾於鄒鬻茅作堂我
徒我環築室於牆我既遷逝心存我舊夢我瀆上立於
王朝其夢如何夢爭王室其爭如何夢王我弼寤其外
邦嘆其喟然念我祖考泣涕其漣微微老夫咨既遷絕
洋洋仲尼視我遺烈濟濟鄒魯禮義唯恭誦習絃歌異

於他邦我雖鄙者心其好而我徒侶爾樂亦在而

樂志詩二首

漢仲長統

飛鳥遺跡蟬蛻亡殼騰蛇棄鱗神龍喪角至人能變達
士拔俗乘雲無轡騁風無足垂露成幃張霄成幄沆瀣
當餐九陽代燭恒星艷珠朝霞潤玉六合之內恣心所
欲人事可遺何為局促大道雖遺見幾者寡任意無非
適物無可古來繞繞委曲如瑣百慮何為至要在我寄
愁天上埋憂地下叛散五經滅棄風雅百家雜碎請用

從火抗志山栖游心海左元氣為舟微風為柁遨翔大
清縱意容冶

贈馮文罷遷斥丘令

晉陸機

於皇聖世時文惟顯受命自天奄有黎獻閭闔既闢承
華言建明明在上有集惟彥奕奕馮生哲問允迪天
保定子靡德不鑠邁心遐曠矯志崇邈尊彼承華其容
灼灼嗟我人斯戢翼江潭有命集止翻飛自南出自
幽谷及爾同林雙情交映遺物識心人亦有言交道

實難有頽者并千載一彈今我與子曠世齊歡利斷金
石氣應秋蘭 羣黎未綏帝用勤止我求明德肆於百
里僉曰爾諧俾民是紀乃眷北徂對揚帝祉 疇昔之
游好合纏綿借曰未洽亦既三年居陪華幄出從朱輪
方冀齊鑣比跡同塵 之子既命四牡項領遵途遠蹈
騰軌高騁慶雲扶質清風承景嗟我懷人其邁惟永
否泰有殊窮達有違及子春華後爾秋暉勢將去我陟
彼朔陟非子之念心孰為悲

謁闕里林廟

元揭傒斯

峩峩尼山蔽於魯邦篤生聖人維民之綱
尼山之下有洙有泗有蔚孔林在泗之溪
維彼聖人誘之教之凡厥有民則而效之
維彼聖人覆之載之凡厥有民敬而愛之
既誦其言亦履其武孰秣其馬于林之下
六轡既同周侯之東薦之侑之聖人之宮
其音揚揚其趨蹌蹌其臨皇皇聖人允臧
商公之圖式昭其敬載瞻載思罔不由聖

闕里新廟告成

明 李東陽

巖巖岱嶽新廟有作爰經爰度惟舊規是若載增載拓
以光于前畧 新廟既構其輝孔炤如輻斯輳如越斯
茂若繪若繡惟功之懋厥有加於舊 惟天降菑鬱攸
是崇惟斯文之炯惟帝降命有嚴厥工惟中丞之風監
司之功 廟祀伊俶帝命孔肅曰此大事我其可弗告
染牲冊祝予輔臣是屬臣拜稽首臣曷敢弗恪 廟既
新止禮既殷止聖靈降監饗吉蠲止天在斯文實亨厥

屯如貞斯元如冬斯春惟國有明祀于千萬年

五言古詩七言附

詠史

漢班固

三王德彌溥惟後用肉刑太倉令有罪就逮長安城自
恨身無子困急獨號號小女痛父言死者不可生上書
詣闕下思古歌雞鳴憂心摧折裂晨風揚激聲聖漢孝
文帝惻然感至情百男何憤憤不如一緹縈

詠二疏

晉陶潛

大象轉四時功成者自去借問衰周來幾人得其趣游
目漢庭中二疏復此舉高嘯返舊居長揖諸君傳餞送
傾皇朝華軒盈道路離別情所悲餘榮何足顧事勝感
行人賢哉豈常譽厭厭閭里歡所營非近務促席延故
老揮觴道平素問金終寄心清言曉未悟放意樂餘年
遑恤身後慮誰云其人亡久而道彌著

北戍瑯琊城

齊

江孝嗣

驅馬一連翩目下情不息芳樹似佳人惆悵余何極薄

暮苦羈愁終朝傷旅食丈夫許人世安得顧心臆按劍
勿復言誰能耕與織

和江丞北戍瑯琊城

齊謝朓

春城麗白日阿閣跨層樓蒼江忽渺渺驅馬復悠悠京
洛多塵霧淮濟未安流豈不思撫劍惜哉無輕舟夫君
良自勉歲暮勿淹留

謁孔子廟

梁沈約

巖巖泰山陽湛湛洙泗水鬱鬱楷樹林行行瞻闕里廟

庭獲展敬德容斯仰止當座儼龍蹲參前疑鳳峙羞蠲
拜陵下慨嘆何能已六籍苟磨滅九法孰條理宜哉百
王師萬國恒通祀矧茲禮義邦神化素漸被分符誠愚
朽鉛刀思礪砥上答罔極恩下不愧為士

經陳思王墓

東阿

梁庾肩吾

公子獨憂生丘壟擅餘名樵採枯樹盡犁田荒隧平寧
追晏平樂詎想謁承明且余來錫命無言事結戎飄飄
河朔遠颼颼風郊鳴鴈與雲俱陣沙將蓬共驚枯葉落

古社寒鴉歸孤城隴水哀葭曲漁陽慘鼓聲離家未遠
客安得不傷情

贈任彥昇

梁陸倕

和氣雜美氣下有真人遊壯矣荀文若賢哉陳太丘今
則蘭臺聚萬古信為儔任君本達識殷子復清修既有
絕塵到復見黃中劉

經吳季子廟

陳張正見

延陵高讓遠傳芳世祀移地絕遺金路松悲懸劍枝野

藤侵藻井山雨濕苔碑別有觀風處樂奏無人知

詠史 魯朱雲

唐 盧照隣

昔有平陵男姓朱名阿游直髮上衝冠壯氣橫三秋願
得斬馬劍先斬佞臣頭天子玉檻折將軍丹血流捐生
不肯拜視死其若休歸來教鄉里童蒙遠相求弟子數
百人散在十二州三公不敢吏五鹿何能酬名與日月
懸義與天壤儔何必疲執戟區區在封侯偉哉曠達士
知命固不憂

曉濟膠川南入密界

唐蘇頲題

飲馬膠川上傍膠南趨密林遙飛鳥遲雲去晴山出落
暉隱桑柘秋原被花實慘然遊子寒風露將蕭瑟

古泉驛於陵仲子宅

唐張說

昔聞陳仲子守義辭三公身賃妻織屨樂亦在其中豈
無窮賤苦羞與傾巧同長白臨河上於陵入濟東我行
弔遺跡感嘆古泉空

海上作

唐宋務光

曠哉潮汐池大矣乾坤力浩浩去無際沄沄深不測崩
騰喻衆流決漭環中國鱗介錯殊品氛霞饒詭色天波
混莫分島樹遙難識漢主探靈恠秦王恣遊陟搜竒大
壑東竦望成山北方術徒相誤蓬萊安可得吾君畧仙
道至化孚淳默驚浪宴窮溟飛航通絕域馬韓底厥貢
龍伯修其職粵我邁休明匪躬期正直敢輸鷹隼威以
問豺狼忒海路行已殫輜軒未遑息勞歌元月暮旅睇
滄浪極魏闕渺雲端馳心附歸翼

登歷下古城員外新亭

亭對鵲山湖員外李之芳也

唐李邕

吾宗固神秀體物寫謀長形制開古跡層氷延樂方太
山雄地理巨壑渺雲莊高興汨煩促永懷清興常舍宏
知四大出入見三光負郭皆杭稻安時歌吉祥

濟上四賢詠

唐王維

解印歸田里賢哉此丈夫少年曾任俠晚節更為儒
跡東山下因家滄海隅已聞能狎鳥余欲共乘桴

崔錄事

寶劍千金裝登君白玉堂身為平原客家有邯鄲倡使

氣公卿座論心遊俠場中年不得志謝病客遊梁

成文學

翩翩繇華子多出金張門幸有先人業早蒙明主恩童

年且未學肉食驚華軒豈乏中林士無人薦至尊鄭公

老泉石霍子安丘樊賣藥不二價著書盈萬言息陰無

惡木飲水必清源吾賤不及議斯人竟誰論

鄭霍二山人

過河濱和文學張志尹

唐蕭穎士

隆古日以遠舉世喪其淳慨慷懷黃虞化理何由臻步

出城西門徘徊見河濱當其側陋時河水清且潏滄桑
一以變莽然翳荆榛至化無苦窳宇宙將陶甄太息感
悲泉人往跡未湮瑟瑟寒原暮冷風吹衣巾顧我謏劣
質希聖杳無因且盡登臨意斗酒歡相親

題蒙山

唐
蕭穎士

東蒙鎮海沂合沓百餘里清秋淨氛靄崖崿隱隱起于
役勞往還息徒暫攀倚將窮絕迹處偶得冥心理雲氣
雜虹霓松聲亂風水微明綠林際杳窅丹洞裏仙鳥時

可聞羽人邈難視此焉多深邃賢達昔所止尚子捐俗
紛季隨躡遐軌蘊真道彌曠懷古情未已白鹿凡幾遊
黃精復奚似顧予尚牽纏家業重書史少學務從師壯
年貴趨仕方馳桂林譽未暇桃源美歲暮期再尋幽哉
羨門子

遊馬耳山

諸城

唐
蕭穎士

茲山表東服遠近瞻其名合沓盡溟漲渾渾連太清我
來疑初伏幽路無炎精流水出溪盡覆蘿搖風輕高深

變氣候俯仰暮天晴入谷煙雨潤登崖雲日明乾坤正
含養種植總滋榮草樹皆秀色雖靡亂新聲攀巖挹桂
髓洞穴拾瑤英此地隱微逕何人得長生宿心尚葛許
彌願棲蓬瀛太息宦名路遲迴忠孝情還丹昧遠術養
素慚幽貞安得從此去悠然昇玉京

古風四首

唐李白

秦皇掃六合虎視何雄哉飛劍決浮雲諸侯盡西來明
斷自天啟大畧駕羣才收兵鑄金人函谷正東開銘功

會稽嶺騁望瑯琊臺刑徒七十萬起土驪山隈尚采不死藥茫然使心哀連弩射海魚長鯨正崔嵬額鼻象五嶽揚波噴雲雷鬚鬣蔽青天何由覩蓬萊徐市載秦女樓船幾時迴但見三泉下金棺葬寒灰

齊有倜儻生魯連特高妙明月出海底一朝開光耀却秦振英聲後世仰末照意輕千金贈顧向平原笑吾亦澹蕩人拂衣可同調

昔我遊齊都登華不注峯茲山何峻秀綠翠如芙蓉蕭

颯古仙人了知是赤松借予一白鹿自挾雙青龍含笑
凌倒景欣然願相從

朝弄紫沂海夕披丹霞裳揮手折若木拂此西日光雲
舉遊八極玉顏已千霜飄飄入無倪稽首祈上皇呼我
遊太素玉杯賜瓊漿一餐歷萬歲何用還故鄉永隨長
風去天外恣遊揚

贈范金卿

唐李 白

范宰不買名弦歌對前楹為邦默自化日覺冰壺清百

里雞犬靜千廬機杼鳴浮人少蕩析愛客多逢迎遊子
覩嘉政因之聽頌聲

沙丘城下寄杜甫

唐李白

我來竟何事高卧沙丘城城邊有古樹日夕連秋聲魯
酒不可醉齊歌空復情思君若汶水浩蕩寄南征

秋日魯郡堯祠亭上宴杜補闕范侍御

唐李白

我覺秋興逸誰云秋興悲山將落日去水與晴空宜魯

酒白玉壺送行駐金羈歌鞍憇古木解帶挂橫枝歌鼓
川上亭曲度神飈吹雲歸碧海夕雁沒青天時相失各
萬里茫然空爾思

別魯頌

唐李 白

誰道泰山高下却魯連節誰云秦軍衆摧却魯連舌獨
立天地間清風灑蘭雪夫子還倜儻攻文繼前烈錯落
石上松無為秋霜折贈言鏤寶刀千載庶不滅

送韓準裴政孔巢父還山

唐李 白

獵客張兔置不能挂龍虎所以青雲人高歌在巖戶韓
生信英彥裴子含清真孔侯復秀出俱與雲霞親峻節
凌遠松同衾卧盤石斧冰漱寒泉三子同二履時時或
乘興往往雲無心出山揖牧伯長嘯輕衣簪昨宵夢裏
還云弄竹溪月今晨魯門東帳飲與君別雪崖滑去馬
蘿徑迷歸人相思若煙草歷亂無冬春

對雪奉餞任城六父秩滿歸京

唐

李白

龍虎謝鞭策鷓鴣不司晨君看海上鶴何似籠中鵠獨

立天地心浮雲乃吾身雖將簪組狎若與烟霞親季父
有英風白眉超常倫一官即夢寐脫屣歸西秦竇公敞
華筵墨客盡來臻燕歌落塞雁郢曲迴陽春征馬百度
嘶遊車動行塵躊躇未忍去戀此四座人餞離駐高駕
惜別空慙懃何時竹林下更與步兵鄰

金鄉送韋八之西京

唐李白

客自長安來還歸長安去狂風吹我心西掛咸陽樹此
情不可遣此別何時遇望望不見君連山起烟霧

送族弟凝至晏堦

去單父三十里

唐李白

齊滿原野白戎裝出盤遊揮鞭布獵騎四顧登高丘兔
起馬足間蒼鷹下平疇喧呼相馳逐取樂銷人憂舍此
戒禽荒微聲別雪謳鳴雞發晏堦別雁驚淶溝西行有
東音寄與長河流

送族弟單父主簿凝攝宋城主簿至郭南月橋却
迴棲霞山留飲贈之

唐李白

吾家青萍劍操割有餘閒往來糾二邑此去何時還鞍

馬月橋南光輝岐路間
賢豪相追餞却到棲霞山
羣花散芳園斗酒開離顏
樂酣相顧起征鳥無由攀

魯城東石門送杜二甫

唐李白

醉別復幾日登臨徧池臺
何時石門路重有金尊開
秋波落泗水海色明徂徠
飛蓬各自遠且盡手中杯

魯中送二從弟赴舉之西京

唐李白

魯客向西笑君門若夢中
霜凋逐臣髮日憶明光宮
復羨二龍去才華冠世雄
平衢騁高足逸翰凌長空
舞袖

拂秋月歌筵聞早鴻送君日千里良會何由同

送范山人歸泰山

唐李白

魯客抱白鶴別余往泰山初行若片雪杳在青崖間
高至天門日觀近可攀雲山望不及此去何時還

秋獵孟諸夜歸置酒單父東樓觀妓

唐李白

傾暉速短炬走海無停川冀餐圓丘草欲以還顏年
此事不可得微生若浮烟駿發跨名駒彤弓控鳴弦鷹豪

魯草白狐兔多肥鮮邀遮相馳逐遂出城東田一掃四
野空喧呼鞍馬前歸來獻所獲炮炙宜霜天對舞雙美
人飄飄若雲仙留歡不知疲清曉方來旋

遊泰山六首

天寶元年四月從
故御道上泰山

唐

李白

四月上泰山石平御道開六龍過萬壑澗谷隨縈迴馬
跡遶碧峰於今滿青苔飛流灑絕巘水急松聲哀北眺
崿嶂奇傾崖向東摧洞門閉石扇地底興雲雷登高望
蓬瀛想像金銀臺天門一長嘯萬里清風來玉女四五

人飄飄下九垓含笑引素手遺我流霞杯稽首再拜之
自愧非仙才曠然小宇宙棄世何悠哉

清曉騎白鹿直上天門山山際逢羽人方瞳好容顏捫
蘿欲就語却掩青雲關遺我鳥跡書飄然落巖間其字
乃上古讀之了不閑感此三歎息從師方未還

平明登日觀舉首開雲關精神四飛揚如出天地間黃
河從西來窈窕入遠山憑崖覽八極目盡長空間偶然
值青童綠髮雙雲鬢嘆我晚學仙蹉跎凋朱顏躊躇忽

不見浩蕩難追攀

清齋三千日裂素寫道經吟誦有所得衆神衛我形雲
行信長風颯若羽翼生攀崖上日觀伏檻窺東溟海色
動遠山天雞已先鳴銀臺出倒景白浪翻長鯨安得不
死藥高飛向蓬瀛

日觀東北傾兩崖夾雙石海水落眼前天光搖空碧千
峰爭攢聚萬壑絕凌歷緬彼鶴上仙去無雲中跡長松
入霄漢遠望不盈尺山花異人間五月雪中白終當遇

安期於此鍊玉液

朝飲王母池暝投天門關獨抱綠綺琴夜行青山間山
明月露白夜靜松風歇仙人遊碧峰處處笙歌發寂聽
娛清暉玉真連翠微想象鸞鳳舞飄颻龍虎衣捫天摘
匏瓜恍惚不憶歸舉手弄清淺誤攀織女機明晨坐相
失但見五雲飛

大庭庫

唐李白

朝登大庭庫雲物何蒼然莫辨陳鄭火空靈鄒魯烟我

來尋梓慎觀化入寥天古木朔氣多松風如五弦帝圖
終冥沒嘆息滿山川

登單父陶少府半月臺

唐李白

陶公有逸興不與常人俱築臺象半月迥出高城隅置
酒望白雲商飈起寒梧秋山入遠海桑柘羅平蕪水色
渌且明令人思鏡湖終當過江去愛此暫踟躕

求崔山人百丈崖瀑布圖

百丈崖瀑布
在青郡沂山

唐李白

百丈素崖裂四山丹壁開龍潭中噴射晝夜生風雷但
見瀑泉落如瀑雲漢來聞君寫真圖島嶼備縈迴石黛
刷幽草曾青澤古苔幽絨倘相傳何必向天台

送顏平原

天寶十二年春有詔補尚書十數公為
郡守上親賦詩觴羣公宴于蓬萊前殿

仍贈以繒帛寵餞加等參
美顏公是行為寵別章句

唐岑參

天子念黎庶詔書換諸侯仙郎授剖符華省輟分憂置
酒會前殿賜錢若山丘天章降三光聖澤該九州吾兄
鎮河朔拜命宣皇猷駟馬辭國門一星東北流夏雲照

銀印暑雨隨行輶赤筆仍在篋鑪香惹衣裘此地隣東
溟孤城弔滄洲海風掣金戟導吏呼鳴騶郊原北連燕
剽劫風未休魚鹽隘里巷桑柘盈田疇為郡豈淹旬政
成應未秋易俗去猛虎化人似馴鷗蒼生應望君黃霸
寧久留

和賀蘭判官望北海作

唐高適

聖代務平典輶軒推上才迢遙溟海際曠望滄波開四
牡未遑息三山安在哉巨鰲不可釣高浪何崔嵬湛湛

朝百谷茫茫連九垓挹流納廣大觀異增遲迴日出見
魚日月圓知蚌胎跡非想象到心以精靈猜遠色帶孤
嶼虛聲涵殷雷風行越裳貢水過天吳災攬轡倖將擊
忘機鷗復來緣情韻騷雅獨立遺塵埃吏道竟殊用翰
林仍忝陪長鳴謝知己所媿非龍媒

和崔二少府登楚丘城作

唐高適

故人亦不過異縣久棲託辛勤失路意感歎登樓作清
晨眺原野獨立窮寥廓雲散芒碭山水還睢陽郭遶梁

即襟帶封衛多漂泊事古悲城池年豐愛墟落相逢俱
未展攜手空蕭索何意千里心仍求百金諾公侯皆我
輩動用在謀畧聖心思賢才竭來刈葵藿

同羣公秋登琴臺

唐高適

古迹使人感琴臺空寂寥一日顧遺塵千載如昨朝臨
眺自茲始羣賢久相邀德與形神齊孰知天地遙四時
何倏忽六月鳴秋蜩萬象歸白帝平川橫赤霄猶是對
夏伏幾時有涼颭燕雀滿簷楹鴻鵠搏扶搖物性各自

得我心在漁樵兀然還復醉尚握樽中瓢

宓公琴臺詩三首

甲申歲適登子賤琴臺賦詩三首首章懷宓公之
德千祀不朽次章美太守李公能嗣子賤之政再
造琴臺末章多邑宰崔公能繼子賤之理

唐高適

宓子昔為政鳴琴登此臺琴和人亦閑千載稱其才臨
眺忽悽愴人琴安在哉悠悠此天壤惟有頌聲來

邦伯感遺事慨然建琴堂乃知靜者心千載猶相望入
室想其人出門何茫茫惟見白雲合東鄰鄒魯鄉
皤皤邑中老自誇邑中理何必登君堂然後知君美開
門無犬吠早卧常晏起昔人不忍欺我今還復爾

宋中 三首

唐 高適

梁王昔全盛賓客復多才悠悠一千年陳迹惟高臺寂
寞向秋草悲風千里來

逍遙漆園吏冥沒不知年世事浮雲外閒居大道邊古

來同一馬今我亦忘筌

常愛宓子賤鳴琴能自親
邑中靜無事豈不由其身
何意千年後寂寞無此人

東平路中大水

唐高適

天災自古有昏墊彌今秋
霖霖溢川原瀕洞涵田疇
拍塗適汶陽掛席經蘆洲
永望齊魯郊白雲何悠悠
傍沿鉅野澤大水縱橫流
蟲蛇擁獨樹麋鹿奔行舟
稼穡隨波瀾西成不可求
室居相枕藉鼃黽聲啾啾
仍憐穴蟻

漂益羨雲禽遊農夫無倚著野老生殷憂聖主當深仁
廟堂運良籌倉廩終爾給田租應罷收我心何鬱陶征
旅亦悲愁縱懷濟時策誰肯論吾謀

望嶽

唐杜甫

岱宗夫何如齊魯青未了造化鍾神秀陰陽割昏曉盪
胸生層雲決眚入歸鳥會當凌絕巔一覽衆山小

陪李北海宴歷下亭

唐杜甫

東藩駐皂蓋北渚凌清河海右此亭古濟南名士多雲

山已發興玉珮仍當歌脩竹不受暑交流空湧波蘊真
愜所遇落日將如何貴賤俱物役從公難重過

同李太守登歷下古城員外新亭

唐杜甫

新亭結搆罷隱見清湖陰跡藉臺觀舊氣冥海岳深圓
荷想自昔遺堞感至今芳宴此時具哀絃千古心主稱
壽尊客筵秩宴北林不阻蓬華興得無梁父吟

昔遊

唐杜甫

昔者與高李同登單父臺寒蕪際碣石萬里風雲來桑
柘葉如雨飛藿共徘徊清霜大澤凍禽獸有餘哀是時
倉廩實洞達寰區開猛士思滅寇將相望三台君王無
所惜駕馭英雄才幽燕盛用武供給亦勞哉吳門轉粟
帛泛海凌蓬萊肉食三十萬獵射起黃埃隔河憶長眺
青歲已摧頽不及少年日無復故人杯賦詩獨流涕亂
世想賢才有能市駿骨莫恨少龍媒商山議得失蜀主
脫嫌猜呂尚封國邑傳說已鹽梅景晏楚山深水鶴去

低回龐公任本性攜子卧蒼苔

觀海

唐獨孤及

北登渤澥島回首秦東門
誰尸造物功鑿此天池原
瀕洞吞百谷周流無四垠
廓然混茫際望見天地根
白日自中吐扶桑如可捫
迢遙蓬萊峰想像金臺存
秦帝昔經此登臨冀飛翻
揚旌百神會望日羣山奔
徐福竟何成羨門徒空言
唯見石橋足千年潮水痕

雲門山投龍詩

有唐天寶玄默歲某月己巳中散大夫使持節北海郡諸軍事北海郡太守柱國天水趙居貞登雲門山投金龍環壁奉為開元天地大寶聖文神武皇帝祈福也先是投禮太守不行以掾吏代之余是年病目戾止以為聖上祈祐宜牧守躬親吏輒代非禮也余撰良日爰及中元下元俱躬行為聖上祈壽祝拜焚香投龍禮畢有瑞雲從洞門而出五色紛郁迴翔空中聲曰皇帝壽一萬一千一百

歲頂禮者悉聞之余乃手舞足蹈賦詩以歌其事
遂於巖前刻石壁以記之

唐趙居貞

曉登雲門山直上一千尺絕頂彌孤聳盤途幾傾窄前
對豎裂峰下臨削成壁陽巘靈芝秀陰崖仙乳滴大壑
靜不波渺溟無際極是時雪初霽沍寒水更積披展送
龍儀寧安服狐白沛恩惟聖主祈福在方伯三元章醮
昇五域靈暉覲帝幕翠微亘機茵丹洞闢祝起鳴天鼓
拜傳端素冊霞間朱紱縈嵐際黃裳襲玉策奉誠信仙

佩俟奔繹香氣入岫門瑞雲出巖石至誠必招感大福
旋來格空中忽神言帝壽萬千百

宋氏五女

貝州宋處士廷芬五女若華若昭若倫若憲若荀

唐王建

五女誓終養貞孝內自持兔絲自縈紆不上青松枝晨
昏在親傍閑則讀書詩自得聖人心不因儒者知少年
絕音華貴絕父母詞素釵垂兩髦短窄古時衣行成聞
四方徵詔環珮隨同時入皇宮聯影步玉墀鄉中尚其

風重為修茅茨聖朝有良史將此為女師

懷古二首

唐 李德裕

河水昔將決衝波溢川潯崢嶸金堤下噴薄風雷音投
馬穴未弭為魚嘆方深惟公執圭璧誓與身俱沈誠信
不虛發神明宜爾臨湍流自此迴咫尺焉能浸逮我守
東郡悽然懷所欽雖非識君面自謂知君心意氣首相
合神期無古今登城見遺廟日夕空悲吟

東郡太守王尊

宋氏遠江左豺狼滿中州陽君守滑臺終古垂英猷數

奴城既毀萬夫心莫留跳身入飛鏃免胄歸霜矛畢命
在旗下僵尸橫道周義風激河汴壯氣淪山丘嗟爾抱
忠烈古來誰與儔就烹感漢策握節悲陽秋顏子綴清
藻鏗然如紫璆徘徊望故壘尚想精魂遊

濮陽太守陽瓚

泰山石

唐李德裕

雞鳴日觀望遠與扶桑對滄海似鎔金衆山如點黛遙
知碧峯首獨立烟嵐內此石依五松蒼蒼幾千載

送任畹評事赴沂海

唐姚合

擲筆不作尉戎衣從嫖姚嚴冬入都門僕馬氣益豪沂
州右雄鎮士勇旌旗高洛東無憂虞半夜開虎牢丈夫
貴功名不貴爵祿饒仰眠作書生衣食何由銷任生非
常才臨事膽不搖必當展長畫逆波斬鯨鰲九陌塵土
黑話別立遠郊孟堅勒燕然豈獨在漢朝

頌魯

昔謂孔宣父絕糧於陳蔡歷國七十二不遇其一
君或云命不遇也愚謂聖人刪詩定禮出處行藏

承天之意非由命焉不然論語不曰天之未喪斯
文也匡人其如予何又曰下學而上達知我者其
天乎以斯明矣因得為頌魯章凡十四句

唐
蘇拯

天推魯仲尼周游布典墳遍遊七十國不令遇一君一
國如一遇單車不轉輪良由至化力為國不為身禮樂
行未足遭迴厄於陳禮樂今有餘袞冕當聖人傷哉絕
糧議千載誤云云

宿顧城二首

范縣

唐張直

綠草展青裯
樾影連春樹
茅屋八九家
農器六七具
主人有好懷
褰衣留我住
春酒新潑醅
香美連糟漚
一醉卧花陰
明朝送君去

醉卧夜將半
土庖聞雞啼
驚駭問主人
為我剖荒迷
武湯東伐韋
顧君含悲悽
神奪悔悟魄
幻化為石雞
形骸僅盈寸
咿喔若蜩蛭
吾村耕耘叟
多獲於鋤犁

高士詠十二首

唐吳筠

展禽抱純粹滅跡和光塵高情遺軒冕降志救世人百

行既無玷三黜道彌真信謂德超古豈惟言中倫

柳下惠

榮期信知止帶索無所求外物非我尚琴歌自優游三

樂通至道一言醉尼丘居常以待終嘯傲夫何憂

榮啟期

原生何淡漠觀妙自怡性蓬戶常晏如弦歌樂天命無

財方是貧有道固非病端木欽高風退慙車馬盛

原憲

世情矜寵譽傲節徼當時顏闔遵無名飯牛聊自怡逃

聘鄙束帛鑿坏欣茅茨託騁器塵表放浪世莫知

顏闔

周豐貴隱耀靜默尊無名魯侯詢政體喻以治道精莅
人在忠慤疑叛由會盟一言達至義千載良為程周豐

黔婁蘊雅操守約遺世華淡然常自怡與物固無瑕哲

妻配明德既沒辨正邪辭祿乃餘貴表謚良可嘉黔婁

萊氏道已遠伊妻德彌清一遁囂煩趣永契雲壑情祿

位非所重拂衣遂遐征杳然從我願豈為物所撓

老萊
夫妻

皎皎於陵子已賢妻亦明安茲道德重顧彼浮華輕琴

書不為務祿位不可榮逃跡終灌園誰能達世情

於陵
夫妻

高哉彼顏歎逸氣陵齊宣道尊義不屈士重王來前崇

祿安可誘保和從自然放情任所尚長揖歸山泉

顏歎

仲連秉奇節釋難合道情一言却秦圍片札降聊城辭

金義何遜讓祿心益清處世功已立拂衣蹈滄溟

魯仲連

東方稟易象翫世隱廊廟棲心抱清微混跡秘光耀玄

覽寄數術納規在談笑賣藥五湖中還從九仙妙

東方朔

吾嘉臺孝威樂道隱巖穴吾尚管幼安棲真養高節採

藥聊自給觀書任所悅風塵不可混真素比松雪

臺佟管寧

棲霞山夜坐

唐僧靈一

山頭戒壇路幽映雲巖側四面青石床一峯苔蘚色松
風靜復起月影開還黑何獨乘夜來殊非晝所得

過堂邑寄耿幾父

宋黃庭堅

呼船凌大河驅馬踏平沙道傍開新邑千戶有生涯四
衢平且直綠樹陰縣衙問誰作此邑者舊對予嗟前日
耿令君遷民出坳窰始遷民懷土異端極紛拏既遷人
氣和草木茂萌芽桃李雖無言春風滿城花陵陂青青

麥烟雨潤桑麻自非耿令君大澤荒蕪葭白頭晏起飯
襁褓語嘔啞自非耿令君漂轉隨魚蝦豈弟民父母不
專司斂賒令君兩男兒有德必世家問今令安在解官
駕柴車當時舞文吏白璧強生瑕令君袖手去不忍試
虎牙人往惜事廢感深知政嘉我聞耆舊語歎息至昏
鴉定知循吏傳來者不能加今為將軍客軒蓋湛光華
幕府省文書醉歸接羅斜懷寶仁者病偷安道之邪勉
哉思愛日贈言同馬搯

詠田單

宋 王安石

潛王萬乘齊走死區區燕田單一即墨掃地如風旋舞
鳥怪不測騰牛怒無前飄颻樂毅去磊砢功名傳掘葬
與剿降論乃愧儒先深誠可奮士王蠋豈非賢

鄆州新堂夜月 二首

宋 蘇軾

去歲遊新堂春風雪消後池中半篙水池上千尺柳佳
人如桃李蝴蝶入衫袖山川今何許疆界已分宿歲月
不可思駛若船放溜繁華真一夢寂寞兩榮朽惟有當

時月依然照杯酒應憐船上人坐穩不知漏

明月入華池反照池上堂堂上隱几人心與水月涼風
螢已無迹露草時有光起觀河漢流步屨響長廊名都
信繁會十指調笙簧先生病不飲童子為燒香獨作五
字詩清絕如韋郎詩成月漸側皎皎兩相忘

和潞公超然臺次韻

宋蘇軾

我公厭富貴常苦勲業尋相期赤松子永望白雲岑清
風出談笑萬竅為號吟吟成超然詩洗我蓬之心嗟我

本何人麋鹿強冠襟身微空志大交淺屢言深囑公如
得謝呼我幸寄音但恐酒錢盡煩公揮橐金

登常山絕頂廣麗亭

宋蘇軾

西望穆陵關東望琅邪臺南望九仙山北望空飛埃相
將叫虞舜遂欲歸蓬萊嗟我二三子狂飲亦荒哉紅裙
欲先去長笛有餘哀清歌入雲霄妙舞纖腰回自從有
此山白石對蒼苔何常有此樂將去復徘徊人生如朝
露白髮日夜催棄置當何言萬劫終飛灰

安期生并序

宋蘇軾

安期生世知其為仙者也然太史公曰蒯通善齊人安期生生嘗以策干項羽羽不能用羽欲封此兩人兩人終不肯受亡去予每讀此未嘗不廢書而嘆嗟乎仙者非斯人而誰為之故意戰國之士如魯連虞卿皆得道者歟

安期本策士平日交蒯通嘗干重瞳子不見隆準公應如魯仲連抵掌吐長虹難堪踞牀洗寧挹扛鼎雄事既

兩大謬飄然簫遺風乃知經世士出世或乘龍豈比山
澤臞忍饑啖栢松縱使偶不死正堪為僕僮茂陵秋風
客望祀猶蟻蜂海上如瓜棗可聞不可逢

望海

宋蘇軾

東海如碧環西北捲登萊雲光與天色直到三山迴我
行適仲冬薄雪收浮埃黃昏風絮定半夜扶桑開參差
太華頂出沒雲濤堆安期與羨門乘龍安在哉茂陵秋
風客勸爾麾一盃帝鄉不可期楚些招歸來

蓬萊閣下石壁千丈為海浪所戰時有碎裂淘灑
歲久皆圓熟可愛土人謂此彈子渦也取數百枚
以養石菖蒲且作詩遺垂慈堂老人

宋蘇軾

蓬萊海上峯玉立色不改孤根捍滔天雲骨有破碎陽
侯殺蘆角陰火發光彩纍纍彈丸間瑣細成珠琲閭浮
一漚爾真妄果安在我持此石歸袖中有東海垂慈老
人眼俯仰了大塊置之盆盎中日與山海對明年菖蒲

根連絡不可解儻有蟠桃生旦暮猶可待

題靈巖寺

宋蘇轍

青山何重重行盡土囊底岩高日氣薄秀色如新洗入
門塵慮息盥漱得清泚升堂見真人不覺首自稽祖師
古禪伯荆棘昔親啟人跡尚蕭條豺狼夜相舐白鶴導
清泉甘芳勝醇醴聲鳴青龍口光照白石陞尚可滿畦
塍豈惟濯蔬米居僧三百人飲食安四體一念但清涼
四方盡兄弟何言庇華屋食苦當如薺

謁岱祠即事

宋晁補之

澤南三百里極望橫天雲雲端色凝黛諦視初可分崢嶸介丘像頽洞元氣屯頃刻有變化慘澹殊明昏天行帝出震其位生物元不周儋西北川乃東南奔寧知六鼇死竟使三山淪不有是難傾孰維大塊根嘗聞周官說實維天帝孫神靈所鎮守民物斯茫存幽明脗一理有道惟常尊不覺下馬拜僮奴亦蹲循迺知正直理足使冥頑敦三王有損益商人所尊神明法或不懼夜行

安得遂以此轉世教庶幾驅驚民莫宿太平驛不眠慮
絲棼明朝好天色萬象開胚渾勢橫怕碣盡支壓齊魯
蹲五色冒日觀一握通帝閭恢拓下摧雍青蒼上氤氲
泉石競沮洳烟嵐互紛綸高舉蹋風海深蹠蹈火輪波
濤捲堆阜一一溟渤吞棋枰視井邑七箸藏松椿碧瓦
峙雙闕紅牆繚長圍願瞻巖閣客內滌邪垢魂賜臣登
絕頂一覽神秀原萬壑射窈窕三壇矗嶙峋莽不覩項
領何能窮胫根稍稍指鳬繹依依數云亭松列大夫爵

羸識將軍墳，瑣屑澗花麗。霏微崖葍薰，廣大良有以。奇
險安足論，瑰詭有形上。頽然德彌惇，得無希夷子傲世。
逃深榛，亦有黃冠士相對。如麋麋此曹，嚙草木語道良。
未聞解榻坐中觀，洗心馳大鈞。形氣要得一，不然隨物
泯。是事亦姑置，幽尋聊可勤。初疑無字碑，瑩潔誰敢文。
又怪玉女井，高絕何由齋。俯穿鬪仙巖，鳥下天壁垠。側
度五賢堂，熊經背逡巡。劍石危素履，女蘿柔屢捫。揮斤
八極遠，風來袂軒軒。寥廓自無梯，猶疑天可賓。陰谷不

可視恐落魑魅羣安得遂獨往身如黃鵠翻周流遍五
嶽採掇芝英繁即欲憇圓嶠或當止崑崙衆真迎我語
一笑顏玉溫是中差可樂子胡戀塵樊荅此太遺物身
閒猶事君重華迹已遠秦漢事方煩成功屬吾宋五禮
垂後昆皇帝二載春臣備太史員紬繹自帝典頗識康
哉言泥金白玉字願頌無前勲有志類韓愈無書愧文
園臣髮將雪素臣心猶日暎今此在林藪跳身同獍猿
徒觀衆山小愁絕下天門

過南華

宋孫漸

挾策自弱齡周覽南華書茫然訪道志欲駕將焉如揭
來南華道始識其故墟塵跡寄委蛻萬事同蘧廬想其
為吏時傲世樂有餘天地等毫末軒冕同錙銖三公禮
華戶萬乘尊褐夫去古邈已遠澆風日淪胥得喪嚇腐
鼠怒悅紛衆狙材否笑驚雁斷續傷鶴鳬釣臺已湮沒
漆城復荒蕪恨不見斯人逍遙與之俱還淳以反樸撫
俗歸黃虞神交付恍惚日暮尤躊躇

登靈巖

宋杜欽况

山迴路疑絕林深秘巖扃鑿翠出金碧開軒列雲屏希
有昔成道久矣斯巖靈法定卧蒼壁白日穿空明令威
指泉竇一鑒秋寒澄定水供萬衆不縮亦不盈如公禪
宗秀於世本無營聊為出山雲乘風無縱橫坐令多寶
藏百神轉雷霆夜月嘯彫虎玉匣開晶熒笑指八斛池
外流中不傾何必空山雷始悟物我情

發魚臺作

宋文天祥

晨炊發魚臺萍雨飛擊面團團四野周冥冥方象變疑
是江南山烟霧昏不見豈知此中原今古經百戰英雄
化為土飛霧洒郊甸天寒日欲短遊子淚如霰

新濟州

今鉅野縣

宋 文天祥

借問新濟州徐鄆兄弟國昔為大河南今為大河北垂
雲陰萬里平原望不極百草盡枯死黃花自秋色時時
見桑柘青青雜阡陌路上無行人烟火渺蕭瑟車轍紛
縱橫過者臨岐泣積潦流交衢霜蹄破叢棘江南寒未

深銅爐獸花赤馬知行路人鐵冷衣裳濕

汶陽路遇雨

宋 文天祥

積雨不肯霽行路如涉川青氈繚我後白氈覆我前我
欲正衣冠兩手如糾纏飛沫流被面代我泣涕漣鴻雁
分南翔遊子入北燕平楚渺四極雪風迷遠天昔聞濟
上軍又說汶陽田我今履其地弔古蒼蒼烟男兒欲了
事長虹射寒泉

自汶陽至鄆

宋 文天祥

渺渺中原道勞生歎百非風雨輕打人泥濘飛上衣目
力去天短心事與時違夫子昔相魯侵疆自齊歸

宿高唐州

宋 文天祥

早發東阿縣暮宿高唐州哲人達幾微志士懷隱憂山
河已歷歷天地空悠悠孤館一夜宿北風吹白頭

穀城黃石公廟

金 元好問

羈客無怙居六月走長路清風黃石祠地古欣所遇劍
飛素靈哭龍躍雲雨赴堂堂文成君談笑取帝傳功名

要有命陰相果何與誰謂圯上人異事驚竹素河清不
可俟筋力疲世故袖間一編書塵埃嘆遲暮

濟南廟中古檜同叔能賦

金元好問

亭亭祠宮檜鬱鬱上雲雨扶持幾年造物心獨苦青
餘玉川潤根入鐵岸古雖舍梁棟資斤斧安得取沈湫
地中久駭浪思一鼓天柱屹不移水國奠平土乾坤此
神物甲乙存世譜瀨鄉留耳孫闕里傳鼻祖秦松徒自
污蜀柏聊共數會待十抱成茲焉重摩拊

遊靈巖

金任熊祥

岱嶽看未厭復來遊方山林中路十里乘興一躋攀忽
至靈巖寺峰巒四壁環殿閣相掩映絕景非塵寰古佛
道場在宛然寺中間袈裟變為鐵傳付一何慳錫杖引
出泉萬古流潺潺相逢佛日老談道叩玄關揖我石上
坐清風為解顏翻思平生事官途歷險艱却羨高飛鳥
猶得倦知還幾時謝冠蓋來伴白雲間

題五峰山

長清

元杜仁傑

青崖何亭亭險絕不可狀中有仙人臺曾此簇天仗千年跡已陳剪滅復誰勦賢哉王真隱志欲鏟壘障林中萬古灘手獨闢空曠得非借天巧無乃煩鬼匠向來樵木場今為錦繡帳泉鳴灌木杪人語飛鳥上居人固自輕過客誠難忘時危乍便靜景勝翻增愴信宿已過期久留非涉妄明日黃塵中回頭失崑閬

登靈巖

元郝經

岱宗西北馳倒卷碧玉環嶽靈秘雄麗勢欲藏三山初

從谷口入兩崦爭孱顏漸疑下地底細路深屈盤仰視
覺天窄石井攢峰巒陸海浩劫開突兀仁王壇桐鯨吼
西風棟宇攢高寒石龍噴清泉灑落几案間脩竹掃山
色瑩綠穿雲根丹鳳饑不來寂莫青琅玕上方在天上
下視無塵寰空霏鎖霜樹翠錦蒙朱殷西日迴清暉輕
金滿烟鬟何時脫世網振衣高盤桓靜境求初心滯慮
驅萬端向晚烟霏合更欲窮躋攀路斷不得前矯首時
一看

青州山行

元郝經

薄遊東諸侯致敬多擁篲訖無安巢木歲晏復反鞞飲
馬南洋橋摩玩米芾記蛟龍郁蟠拏劍戟磔芒刺酌別
表海亭激灩吸空翠霜風吹鴻鵠草野簇車騎日斜過
雲門凌跨方半醉垠嶸亂葉滑蹭蹬幾欲墜懸崖半遏
面絕澗黑無地入險難遽止眩運不敢視層崖宿山家
坐久猶膽悸居民畏馬嘶遊子喜犬吠汲遠終夜喧月
斜人未睡柴關見星稀枕石餘蘚膩酒散身逾困饑透

食有味忽聞炒椒巔虎去失羸牴陰森木石怪慘冽霜
露氣黎明轉重崦呀互急幽悶繚繞天一線陷日孤光
細嵌隙深且蒼白晝悲魑魅過午纔得水飲漱解鞍憩
却是城西河山間更清駛彎環折鱸腸詰曲亂之字跋
涉重跋涉深淺頻厲揭林開見石田數頃牛角銳淳俗
久深居見人但驚避農婦帛纏頭應門聳高髻破屋有
村翁無言但流涕舉鞭為撫摩俾說山中事都因七十
垧鹵莽各稱帝實戶三百萬食盡猶未弃白骨與山齊

查牙誰與瘞幸得脫齒頰瘡殘餘一臂年來立海州遺
唯更疲弊邊郡增仇敵深山無子弟聞此不忍聞愴怛
復噓噓海岱稱東秦山河號十二峽口吞穆陵渤海卷
無棣初從霸國後往往逞克獬號公死巖邑恃制殆非
計祇為殘民區每起奸雄志窟宅多龍蛇桃源難避世
數日出脩阻川途漸平易雲梢見萊蕪孤城隱霾曠回
視青萬疊乾坤屹軒輊穿出過徂徠背轉逾汶泗泰山
正面看益見崇高勢目中好全齊蒯生莫兒戲為告慕

容超勿謂燕得歲

禱雨龍洞山

歷城

元趙孟頫

蒼山如犬牙細路入深谷絕壁千餘仞上有凌雲木陰
崖不受日洞穴自成屋蕭森人跡少蒼蔚獸攸伏雲林
忽隱映澗道相迴復翔禽薄穹霄鳴鳥響巖曲臨橋濯
清颼汲井漱寒玉神物此淵潛愆陽有祈祝風濤慙善
教吏俗恥厚祿暫懷塵外想獨往疑有牯過幽難久居
濟勝之高躅策馬尋故蹊歸樵相追逐

咏魯仲連

元趙孟頫

驅車策駑馬吾將適齊國聞有魯連子倜儻好奇畫一
談秦師走再說聊城拔功成不受賞高舉振六翮布衣
終其身豈復為身役茫茫千載遠安往訪遺跡躊躇東
海上向風長太息

過徐君墓

元李謙

瘠鹵豐茅管荒林翳荆棘此地果何地云有徐君域當
年吳公子過此聘上國心交固已許一劍非可惜豈期

輶車還君已掩窀穸撫摩三尺鐵欲交知無及惟有掛
劍樹此恨庸可釋精誠達泉壤千載未容息至今地效
靈化為異草碧采采不忍去觀此疑今昔今人交面顏
昔人示胸臆胸臆久益堅面顏徒外飾我詩誌其墓匪
獨弔陳迹百世聞高風衰俗庶可激

仙臺山弔古

嶧縣

元王 邁

古鄆已丘墟喬木搖秋風蘭陵亦荒廢滿目荆榛豐長
繩不繫日尤歎登臨中今人弔古迹俯仰今古同萬事

滾滾來過眼烟雲空杯酌散襟顏鄭重麴生功望酹二
疎宅先賢道何崇黃金不少留勇退真英雄

荀子善著書辨作焚書禍始作客卿師高論毋乃過望
之與匡衡輔漢真良佐轉瞬兩古塚虛致麒麟卧荒城
二疎宅幾作如來座數賢等塵迹幻夢恍然破儻來如
雲浮事去驚甌墮美惡留虛名馬耳春風過

咏二疏

元劉因

委質義有歸乞骸老當去豈無戀關心難忘首丘趣在

禮此常典末世成高舉漢庭多公卿圖畫兩疏傳至今
秦中吟感歎東門路目覩霍將軍功高歎恩顧一朝墮
危機千載捐英譽仲翁幸及年安肯嬰世務聖主賜臣
金奉養行厥素造物佚我老餘齡今自悟田園付子孫
身後復無慮神交冥漠中樂境尚森著

題思聖堂

元胡祇道

汶上魯中都哲人幸茲邑石刻思聖堂後人知仰德汗
地困飛龍鸞鳳棲枳棘天意人豈知來者三太息立言

澤萬世貧賤何足惜再拜登故臺斂衽拱而立如何夢
見之受教開茅塞

望大勞山

元戴良

稍入東膠界即見大勞山峯攢倅劍戟嶂疊類雲烟稜
稜挿巨海渺渺漾中川波濤共突兀天日相澄鮮祇若
棲島嶼觀宇連樹阡既館茹茅士亦巢遁世賢客行積
昏旦水宿倦舟船茲焉思獨往結茅徵願言柁師不我
從太息歸中原

趵突泉

元張養浩

物平莫如水堙阻乃有聲云胡在坦夷起立若紛爭無
乃滄溟穴漏洩元氣精不然定鬼物搏激風濤驚竒觀
天下無每過煩襟清茫茫彼區域載物良不輕微水坤
焉浮非天水奚生孰知一脈許而與天地并因之有真
悟日晏忘濯纓

濟州登太白樓

元張養浩

高城蘸雲根聊可慰心跡長風萬里來如對騎鯨客監

州好事者樹此樓與石隆鼻號金仙更長謾嗟惜

遊金牛山三十韻

元張起巖

全生愛林壑夢想雲水間倏然外塵囂俗類寧相關一
行墮世網着脚多阻艱回望故山雲逋客幾汗顏逝矣
古肥城岱麓空翠環有山名鬱葱秀色青雲端中藏古
招提簷戶擅林巒我来稅塵鞅幽境窮躋攀層岡列屏
障曲逕穿荆管壞橋擁流水激石聲潺潺山門勝雄視
殿宇凌高寒旃檀矗青瑤文風餘朱顏斗拱鏤珍木金

碧紛爛斑老柏數十圍枝柯駁蒼頑石泉湛清冷古洞
秘神筌境與心迹清恍若遺人寰同遊二三子欲去還
為言迫春初煖日未足稱奇觀首夏山櫻熟紅珠瑩堪
餐佳樹影清密好鳥聲綿蠻松露墜青滴岩雲擁髻鬟
烟蘿罩虬枝靈草封法壇晴嵐新霽餘飛湍瀉碕灣聞
之灑然笑襟懷豁幽閒更愛讀書堂當年萃衣冠中有
擢桂仙聲名藹朝班健筆壯精舍盛事留茲山便欲謝
簪紱眠雲弄潺湲午風鳴素琴春醪灑清歡題詩約山

靈莫云迂夫孱

石門山

元劉子房

遠遊適絕境艱難困行役
戕戕石門山蒼蒼兩厓闢
雲棧中盤紆風濤外撞擊
羸馬厭微逕荒祠栖叢棘
石樹和烟蒼植草帶日夕
俯身蓬萊城孤塔出雲立
獨向霧中來遙遙羨雲翼

遊竹林寺

元王旭

石逕俯雲壑竹林開幽境
寺古僧徒稀山深嵐氣冷
行

遊未終興紅日忽倒影曳杖投暝烟長歌下前嶺

過東昌

明劉基

夜發高唐灣旦及東昌郭喬樹拂疎星霜飛月將落仰
觀天宇清平見原野廓白楊號悲風蔓草杳漠漠但見
荊棘叢白骨翳寒籜聖道懸日月斯人非虺蜥教養既
迷方欲熾性乃鑿辰季骨已朽清風散藜藿弦歌滅遺
音繭絲盡籠絡鷄嘯颺憑螽鳴草蟲躍遂令一變姿
化為跼與蹻况聞太行東水旱荐為虐饑氓與暴客表

裏相依著賑卹付羣吏所務惟刻削征討乏良謀乃反
恣剽掠坐令參苓劑翻成毒腸藥今年秋租登行止稍
有託餘波尚披猖未敢恣一噓但恐習俗成何由返初
昨藩宣有重寄胡弗慎遠畧

伯夷叔齊祠

昌樂

明劉基

商業昔淪季豕蛇逮逸民廉來且柄國播棄乃斯人殷
德苟可終歸周竟何陳叩馬止干戈萬世嚴君臣徽歌
苦且怨孔子賢其仁落日西山蕨清風北海濱平生仰

高躅茲拜惻心神

謁先師廟

明黃哲

解組辭鄆郭驅車循魯垞前登闕里近端仰素王靈猗
蘭遺芳潔神檜鬱蔥青時化洽千祀奎光浮四溟多儀
殷廟享斯民傳壁經几筵猶設席容秩儼克庭所念迷
途者空瞻明德馨困蒙今獲吝幽悱未遑寧靡靡寒氷
至塗塗朝露凝遄回馳驅意夙夜思儀型

弔陳思王墓

東阿

明黃哲

鄴都雄盛日英才妙七賢夫君照乘珠五色麗且鮮西
園倡華藻東洛賦嬋娟遊鸞翔朝旭芳渠映碧漣始協
棣華美寧虞箕豆煎桐圭空錫社銀海閉陰泉白楊翳
荆榛狐兔穴其阡喟然魚山嘆肯企淮南仙

過東阿謁黃石公祠

明周忱

神仙尚無為脫畧經世策公持一編書遠授下邳客後
期初見嗔屢往終不惜言可師帝王心將佐邦國豈伊
四皓徒避嬴在山澤因假黃石名泯滅青雲蹟我來登

穀城漢祠宛如昔
畫幃空復張神采
何由覲肅穆薦渚
蘋徘徊誦碑刻黃
鵠去不回蒼崖土
花碧

泗河

明
吳寬

四源合一水古河因以名
望之渺千頃永日汪然清蕩
搖鄒嶧山映帶兗州城餘波
入漕渠資國功匪輕疏濬
藉水部來往勞經營欲渡免
舟楫石堰築且平臨流一
縱步魚鱉不我驚即欲窮其
源何惜此數程念昔洙泗
間講業皆諸生河廣豈水然
聖澤惟盈盈茲遊幸沾溉

自慶非徒行浴沂效前哲春服亦既成

先聖手植櫨

明
吳寬

魯宮久已壞孔宅仍如新悠悠二千載手澤嗟猶存所
存匪他物奇樹當高門矯矯歷霜雪青青出埃塵親承
時雨化生意常欣欣相傳藉文字烈火經嬴秦惟此特
萌蘖挺然異其羣羣木繞庭際合抱高入雲尋常豈得
似隱起成旋文端如人索綯徽纆依然分米芾好奇士
於道未必聞玩物有述作意與石丈均我來重謁拜欲

去步幾巡維魯多松柏斷度見詩人徂徠與新甫遙瞻
失嶙峋

謁尼山

明
李東陽

迢迢魯城路望望尼山峰坤靈在其西顏母在其東周
原敞宏址中有文宣宮年深歲復改上雨無旁風蒼黃
設俎豆俯仰思儀容周旋入寢殿榱棟半已空丹青剝
像貌暴露炎埃中因之起深痛盛額面發紅荒苔卧石
柱隱隱雙雕龍乃知前朝事規制本穹窿興替豈有時

闕里方尊崇紛紛緇黃輩各自傳其宗珠林映貝閣勢
若爭雌雄吾曹衣冠士此涕詎無從昨逢中臺彥感舊
傷遺踪惜哉不共到獨此心冲冲他時按部後為我迴
青驄

陋巷

明
李東陽

至德不世出所居必有隣依依闕里東見此陋巷村天
資本純粹况乃沾陶甄禮樂以為邦克復以為仁當時
七十子此道鮮有聞行藏亦時可不道周公貧傷哉宣

尼慟此涕復何人公封與廟配俎豆垂千春古祠久荒
敝廢井尚未湮洄酌代明祀冷然洗心神舊第入環堵
纓冠見雲孫因之訪益廟鄒嶧東嶙峋遙瞻孔林在且
薦清溪蘋

過汶上訪思聖堂

明李東陽

東入齊魯疆始見聖迹存曰茲中都地宰此社與民大
哉堪輿內何者非吾人平生轍環志且復先鄉隣損也
不宰費顧此逃權臣跡殊本同義於道諒有聞見賢且

思齊希聖復何云徘徊古祠下感嘆傷心神

泰山四首

明 王守仁

曉登泰山道行行入烟霏陽光散巖壑秋容淡相輝雲
梯掛青壁仰見蛛絲微長風吹海色飄颻送天衣峰頂
動笙樂青童兩相依振衣將往從凌雲忽高飛揮手若
相待丹霞閃餘暉凡軀無健羽悵望不能歸

天門何崔嵬下有青雲浮泱泱絕人世迥豁高天秋曠
色從地起夜宿天上樓天雞鳴半夜日出東海頭隱約

蓬壺樹縹緲扶桑洲浩歌落青冥遺響入滄流唐虞變
楚漢滅沒如風漚邈矣鶴山仙秦皇豈堪求金砂費日
月頽頽竟難留吾意在龐古冷然馭涼颼相期廣成子
太虛共遨遊枯槁向巖谷黃綺不足儔

穹崖不可極飛步凌烟虹危泉瀉石道空影垂雲松千
峯互攢簇掩映青芙蓉高臺倚巉削碩側臨崆峒失足
隨烟霧碎骨顛崖中下愚竟難曉摧折紛相從吾方坐
日觀披雲嘯天風赤水問軒后蒼梧叫重瞳隱隱落天

語闔闔開玲瓏去去勿復道濁世將焉窮

塵網苦羈縻富貴直露草不如騎白鹿東遊入蓬島朝
登泰山望波濤隔縹緲陽輝出海雲來作天門曉遙見
碧霞君翩翩起員嶠玉女紫鸞笙雙吹入晴昊舉首望
不及下拜風浩浩擲我玉虛篇讀之殊未了傍有長眉
翁一一能指道從此鍊金砂人間跡如掃

題靈巖寺

明
王守仁

客途亦幽尋窅窅穿谷底塵土填胸臆到此尚一洗仰

視劍戟峰巒巔如泚俯窺蛟龍窟匍伏首如稽異境
固靈秘茲遊實天啟梵語過巖壑簷牙相角觝山僧出
延客經營設酒醴導引入雲霧峻陟歷堂陞石田惟種
椒晚炊仍有米臨燈坐小軒矮榻便倦體清幽感疇昔
陳李兩兄弟侵晨訪遺跡碑碣多荒薺

望海樓郟城

明劉翔

傍海結高樓乃記聖遊跡扶桑曉日紅瑯琊晚峯碧洪
濤吼晴雷孤鴻渺秋色觀此難為言臨風重太息

登泰山 時提學山東

明 鄒善

遙望泰山岑翠律未易陟高高入雲中雲路安可極觸
暑奮必登振衣起蓐食寧不念崎嶇懷此久且亟石逕
隱翠微窈窕通復塞虬松幾何年蒼蒼太古色須臾步
天門徘徊日觀側豈翳盡青徐悠然隘九域瀾瀾洞雲
平俯瞰若憑軾頻語魯諸生萬仞在自力

嶧陽孤桐

明 湛若水

山陽覓孤桐孤桐已無樹雖有千年鳳未知棲泊處琴

瑟非愛身太和沒六呂惟有桐上月古今自來去

咏魯仲連

明何景明

仲連初歷國排難能解紛飛書下燕將立談却秦軍不
受萬戶侯長揖千乘君始為天下士終為海上民

顏廟

明顧夢圭

古木失歲月瓢飲存嘉名寧知沒齒瘁乃有千秋榮冲
虛蘊英發和粹含神明廟貌亦如愚圭衮非其情至人
寶所受氓庶較虧盈三桓故堂廡惻愴郊原平

孟廟

明 顧夢圭

羣邦驚聲利夫子振微言論功卑霸圖述性究靈源遏
欲心乃存服義氣斯全孤身峙喬嶽一喙防頽川我行
古邾國宅里表三遷牛羊下秋坂因懷山木篇

遊靈巖

明 陳 鎬

予豈丘壑士每有烟霞想况茲佳勝處興到成獨往振
衣一舒嘯千古發幽賞竹泉遶青壁霧雨翳林莽不聞
雞犬鳴時發鐘磬響超然會夙心福地信蕭爽

捫蘿上東巖石磴羊腸曲鐵古袈裟冷苔蝕龜趺沒漱
齒甘露泉傍有萬竿綠小憇神魂清寒翠襟鳴玉安知
古高人此境不邁軸精爽迥難招題詩寄幽獨

登單父琴臺

明夏維藩

我聞宓子賤理民如調琴一徽苟不協何以諧大音斯
人既已往高臺空古今不聞流水調但見月影沉我乃
困奔走緇塵日滿襟欲問理民術茫茫不可尋

登太白樓

明梁有譽

天寒霜雪繁日沒城上樓樓中謫仙人玉立娛清秋金
龜換美酒醉脫鸛鵲裘玩弄清玉塵長揖謝王侯我來
千載後萬壑風颼颼聞昔有丹鳳下與凡鳥儔朝食玉
山禾夕宿崑崙丘銜圖將獻誰鳴聲鏘琳球始知空田
雀飲啄徒啁啾營營嗤青蠅楚楚嘆蜉蝣請看黃河水
滔滔萬古流

泰山

明李攀龍

大東有神嶽專名為岱宗日精攝海氣吳野控其峰明

堂朝列后金策紀元功維昔七十家軒轅此登封雲霞
自窈窕石室何青蔥仙人攬玉樹鬚髮生清風靈液飛
潺湲芝草如蒿蓬惟帝擁靈符千載一升中願言與問
道乘龍舉太空

薄暮東牟道中有作

明
王世貞

策騎緣海壖興發遂忘疲將晞九陽髮思振三神衣如
何悲泉側陽烏欲罷飛川后約其波以待朱輪歸櫂色
有遺景梓里無停暉空青就磨滅光景向熹微二氣既

不分吾人安敢違改轡趨林薄命燭叩衡扉有酒但為
歡無酒且息機天雞在東方三鳴不須斯庶哉咸池浴
萬象同赫羲

冒雪遊繡江寺

明 李開先

出門雪初零入寺勢方大龕前有凍花鉢內堆冰菜廢
井填欲平禪庵壓將壞鳴聲忽驚人饑鳥太無賴天花
淨不溜慧澤觸無外迷途惟一悟世塵濯八解安能如
惠可雪中有宴會

碧雲寺

益都

明馮琦

朝望山間雲暮就山間宿佛界何莊嚴入門風肅肅古
殿倚岩岫磴道盤空曲山僧出相迎班荆坐脩竹峯頭
過新雨石髮淨如沐泉聲下石溜歷歷飛寒玉對酒不
知晚星河低以屬良游殊未竟同醉待朝旭

望海

明尹嘉賓

青熒半空碧白沙出林杪謂是雪月明春煙澹將曉咫
尺不可耐飛輶踰渴鳥到來始叫絕懼然莫敢道衆客

幻儵忽遠意含虛渺雲日吹微微千里孤槎小元牝靜
自春釣天奏未了何當鞭三山汾河恣幽討

隱仙洞

嶧山

明
畢懋康

攢石俯山椒崩騰表靈詭循磴上綠蘿崎嶇試徙倚乘
風一披襟冷泉屢傾耳薄言憇巖阿邈若烟霞裏戀景
頓忘疲西照俄移晷返策擬重攀倘逢羨門子

戚城

滕縣

明
顧大申

漢帝營六宇羣雄受羈紲徒手并秦項壯心頓房闥悲

歌抱幼子飲泣訣愛妾羽翼彼已成恩寵中道歇含笑
謝四公虺隤痛傷割朱顏銷永巷旨酒摧晨獵清蹕不
可期黃泉為誰說我來戚城邊蓬飛風凜冽烏鴉啄城
頭巢傾鳥子滅不見當時人但聞水幽咽鳥飛上高柯
未央宮若何

咏定清寺仙桐

明 邢 侗

就甕行見焦胡然覲華茁物理詎有因神功固無滅雲
液漾寒芽陽春被枯蘖蕭寺儼蓬游曹南表仙轍寥爾

上聖鄉未汶沖虛訣白日召羣靈徵年小彭載

登紀城故臺

壽光

明董楠

振衣古高臺倚劍臨丹水茫茫白日低蕭蕭寒風起憶
昔齊正強示弱來朝紀何言墮其謀兵戈有所恃堂堂
旅見儀肅肅君臣禮用計諒已窮強弱俱一死人生譬
朝露意氣徒為爾宮基雜丘壠城隍沒荊棘懷覽復何
嗟無貽壯士恥

大珠山

膠州

明孫鎮

巍巍大珠山其高逼星斗衝擊聞波潮豁爽見陵阜白日落海上青天挂峯首劃然古石室玄冥何代剖時時雲霞出夜夜風雷走古來栖真仙藥室留石臼如何縛塵纓不見長年叟我欲棄家遊未知終得否

伏生祠

鄒平

明

王象春

及見瀉池玉及聽妖嫗哭漢業朝暮間秦皇三十六幸免殞儒坑千代存枯腹東巡望海時攜編竄河曲誰收相府書輿圖共醫卜四皓羽翼成碩人猶邁軸文帝重

六經始來書洛數或云出壁中二者應叅覆太常方授
筆老人口咍喔譯字有女郎授經即晁錯傳之非其人
刑名受竒戮幸當帝愛老平津未側目

石門南澗

膠州

明王 憫

西南還太古巖壑留勝概良辰一相攜遊賞復我輩山
深緩斜陽鴻濛餘蒼藹不謂桃花源乃在招提外好鳥
悅芳草聲聲春欲碎翠濕滴泉香藤老助石恠茶烟上
青空綺散學雲態幽光發竒壑微吟坐其內意到轉忘

言靜與數峰對

黑龍潭道上

膠州大珠山

明王 儁

近益愛龍潭並愛龍潭路兩岸壯羣峰峰峰夾蒼素衆
芳襟幽香我來正春暮似有秦時人其中種桃樹

還龍山吟

國朝孫廷銓

守道在無為吾自厭吾拙解佩及茲晨還山聽鳴鳩世
態逐嬋媛進止心欲折欣此素商集緬想緇塵歇逝將
尋舊侶茅屋陰崖結暝色下巉岩蒼然立積鐵林深倦

鳥集谷靜涓泉咽夜涼四山空雲卧通天闕捫蘿想幽人弄簫遲山月

孝泉博山

國朝趙進美

逶迤近桑梓觸事皆可悅矧茲曉山淨復對寒泉潔寥寥廣殿虛蕭蕭涼風發弱荇搖中池素濤散成雪石壁瀉微雲鳥聲弄清樾倚欄蕩塵纓顧影傷短髮十年困奔走望遠意飛越何當耕溪濱放歌甘薇蕨

管鮑山

國朝法若真

曾負天下才藏身為母老左右無鮑叔埋沒齊山草得
一知己者進退皆可保不然負販人黃金如土掃

阿掖山

安東衛

國朝宋琬

未雨如山醉既雨如山醒遙遙水雲間蒼翠無時定我
攜筇竹根捫蘿踐危磴平穿鷗鷺羣幽造鹿麋徑高峯
矗層霄突兀有餘勁鳴鼓雲色搖吹簫谷聲應僧房山
鳥棲松際孤烟凝薄暮投石牀闌干醉復凭

旌旗山別業

萊陽

國朝宋琬

結廬在山足山勢如垂旂相與共昏晨數過成遠遊閒
身會有時遂得恣遐搜披翳察宿莽脫葉行復勾春風
蟄樹中怒發不可掣荆榛荒有緒篁竿迴相繆紅者為
椽葉黑者如漆髹白日無曠照細泉多奔流時聞驟雨
過出門聽已收坐卧荒草間颯然疑凜秋臯陸亂雲氣
松脂何油油樵人照徑歸餘烟及衾裯固懷山水篇明
膏歎莊周逝將從此去庶令夙疾瘳

趵突泉

國朝
施閏章

勞生慙物役城郭就臨眺
澹澹湧寒泉淵淵發地竅
噴薄陽侯舞顛倒湘靈笑
荇藻冬青蔥雪月皆照曜
時聞獨鶴回遐矚四山峭
逝者悵如斯素心愜從好
晞髮緬潺湲盪胸隔要妙
欲為滄海歌誰同伯牙調

謁孟子廟

國朝
施閏章

磊磊嶧山巔終古棲靈異
巖巖一人起方寸塞天地
獨立芟羣言諸儒折狂喙
俎豆同孔顏宮牆接洙泗
靈旗儼翱翔凌虛入雲際
母氏斷機堂有像若長跪
徬徨復

下拜愴然墮我淚石井湛寒泉古檜含貞翠誰為企前
修吾黨有餘媿

宿海潮菴

國朝 施閏章

精舍俯丹崖複閣眺窮髮眷茲物外遊寧辭雲際歇日
暝紅霞散洞陰瑤草發緩帶馭天風臨流坐海月洪濤
爭怒號島嶼時出沒成連移吾情安期逝超忽天雞鳴
中霄白露如凝雪

朝城公廨有紫荊短碣

國朝 任俠

高齋坐無事射圃聊躑躅時或披荆榛摩挲斷碑讀季
世不復淳動漸寒骨肉念此骨肉寒以致十斛粟紫荆
枯已盡春風吹苜蓿為作紫荆詞用以振隲俗

望嶽

國朝顏光敏

岱宗俯羣山萬疊朝蒼龍綢繆肇元化物象含冲融雲
氣朝四塞倏忽高天空天門如覆盎兩壁來松風邦祀
不敢瀆曠代無登封胡為御道間社鼓聲逢逢石間覆
蘿薜經春益青蔥何時陟峻寧目盡扶桑東

穀城山 東阿

國朝 陳廷敬

子房年少時擊秦博浪中亡匿遊下邳折節圮上翁期
後十三載相見穀城東伏臘祠黃石此義千古雄昔夢
黃鶴客綢繆蓬萊宮蓬萊不可到穀城訪遺蹤扁舟渺
然去但見烟濛濛

仲家淺望嶧山作

國朝 陳廷敬

言過仲家淺仲廟河水傍嶧山對廟門百里來青蒼影
連初日動勢接春水長遙峯挿天漢空翠分岷岡不覩

泰山尊爭長雄東方歛吸亘南戒逶迤趨西疆豁然去
欲無林巒鬱迴翔掩映仲子廟千禩巒相望我茲在川
上漾舟涉微茫前浦行脩途未登洙泗堂生不逢孔子
日月依末光扣舷問漁父夕照明滄浪

遊碧雲寺

國朝
王士禛

十年懷碧雲茲遊至其地寺門雙老松蒼然偃夢寐石
磴鬱岌堯蓮宮啟閤闥入門聞泉聲涓涓出幽邃庭除
有躋攀杖屐不得肆傑閣入霄漢金碧眩空翠處處引

山光墀牖及牀第最愛泉上亭曠然得位置洞深夏無
暑岩幽晚多悖麋鹿時一出蔽岩若有伺衆山如宸負
晴晦各殊致三日此坐卧讀書與酣睡向夕發清吟山
雨颯然至

香山寺

國朝

王士禛

信宿碧雲寺幽意良已適遙望香山寺樹杪見檐櫓丹
樓湧絕壑縹緲架虹蜺晨興命屐往香林露猶滴微風
翼涼襟石路淨如滌山泉環寺門逶迤間松檻來青巖

軒豁憑眺意凌轢却顧山下徑曲折見所歷中楹四牕
書再拜獲恭覲羣山拱几席空翠照瓴甕靜境絕衆囂
天籟自吹激深林伐木聲楚然發空寂回思車馬勞恍
矣中心感何當謝塵鞅長此卧雲壁

徂徠山

國朝
王士禛

晚步石橋上南眺徂徠山委蛇露蒼蔚翛然眉睫間餘
雪一以映宛如好女顏緬昔孔裴輩偕弄竹溪月嘯咏
襍漁釣風流亦清絕又聞石先生讀書山之陽父老尚

能言遺韻何洋洋余既辭世網雅思侶猿鶴逝將營一
椽于茲永棲托睠言野踟躕遠烟生漠漠

新甫山

國朝 王士禛

徂徠既環瑋新甫亦鬱秀蒼蒼百里間與岱相輻輳拄
頰望嶽峯複沓森蹴驟朱霞耀晨嶺白雲涵夕岫輾轉
無定姿晦明相蕩漱定有靈異棲或是仙人囿漢武此
築宮未必方士謬我行快瞻矚恨不躡岩竇為詠閱宮
詩遙集破儒陋

羊氏墓

新泰

國朝 王士祿

我嘗讀往編相者此望氣掘之尚三公不然且奇貴羊
公純臣心乃爾甘折臂粵昔在典午綱維半崩墜處仲
與元子其才亦小異敦既肆狂逞溫復倖非冀維彼陶
士行雅非二子類八州寄已隆刺指定何意矧自操懿
來攘竊睨神器授璽與抽戈悠悠等兒戲叔子去人遠
諒哉非一事即此相提衡詎曰功名士

自石槁尋黛溪遂至摩訶峯下

國朝
王士禎

日落山氣涼清流自迴轉窮源不知勞漸忘溪路遠幽
石各奔峭修樹亦婉孌遙睇徑難測迴矚途屢變寂歷
衆山響蕭條晚風善微徑暮樵出懸崖歸鳥見須臾夕
霏收殘陽四山徧新月忽清揚餘霞自舒卷稍覺葛衣
輕幸藉孤筇健平生丘壑人茲言庶能踐

由柳巷踰西山最高頂至醴泉寺拜范公祠

國朝
王士禎

清境難久留申旦戒徒御引領睇前峰抗策辭東路數
武即嶇欽危蹊少安步顧盼見百里雲日媚烟樹憑高
俯澄湖風帆競孤鶩晴旭移峰巔明晦變已屢褰衣入
空翠溪流渺南注參疎曠遊眺蒼茫失昏曙東山清風
來西澗涼雨度澄潭益蕭瑟游鯉紛散聚前賢跡已遠
山川緬猶故夙昔思古人三歎讀書處

醴泉謁誌公像觀唐碑

開元三年
乙卯立碑

國朝
王士禎

早讀神僧傳緬懷誌公迹劍水蹤已遙鍾山事成昔豈
知長白峰留此千年石鳥爪帶銅綠鏡面瑩蘇碧磨滅
開元碑蟲鳥紛難譯披蘿究遺文剝苔埋殘畫斷闕發
見聞樵牧增歎惜陸銘圯寒冢王碑委荒僻廬陵傲珠
犀東武比博奕淪棄多名珍何憚窮鉤索一勺醴泉水
供此風雨夕神僧傳誌公面瑩徹如鏡手足皆鳥爪碑
有云陸倕製銘于冢內王筠勒碑于寺門

皆與
傳合

醴泉寺高閣瞻眺有懷范文正公

國朝

王士禎

風雨湖上來蕭條灑飛閣殷雷起眉際極目窮寥廓遙
天壓烟水空濛氣磅礴大澤盤蛟龍斜風偃鵬鶚卻眺
鴻濛中日光遠迴錯草木暗四山急淙鳴萬壑悵然思
古人大雅何時作

書堂

國朝

王士禎

絕澗已千仞磴道仍九盤直上若懸溜強屬勢難安右
顧踐鹿跡左顧憑鳥翰日落空山中蕭然風氣寒精舍

壁間立洞門天際看奇石壓巖戶孤立何巔岼突兀拔
澗底窈窕凌雲端入門度飛梁傍夕聞驚湍幽軒宛初
構几榻皆峯巒頗意雷雨時雲氣生戶間諸天發鐘磬
星斗方闌干惆悵此靈境畢然懷懶殘

懷古詩三篇

有序

國朝

王士禎

懷古思古人也生不同時曠世相感千里而外百
代之下猶同一堂矧生其里閑者乎詩曰維桑與
梓必恭敬止予為是詩猶雅人恭敬之意也

七雄既龍鬪陳寶歸嬴秦師出函谷關六國咸逡巡邯鄲日夜急咄嗟誰解紛蕩陰師既頓新行謀豈倫先生畫竒策長揖平原君僕妾愧萬乘大義明君臣縱橫數千言顧却虎狼軍功成不受賞飄然歸海垠蹈海既高義肆志寧辱身至今齊趙士倜儻希清塵我來古陂上遺祠蔓荒榛甍道竄蒼鼠天風吹白蘋緬懷田巴語景行跂千春

魯連陂

末世寡尚志薄俗希乘軒豈不貴纁帛形役神不全吾

高顏夫子抗節貌齊宣鐘簾寧足論殿上呼王前晚食
與安步詎以榮利遷監門良自賤趨士理亦賢俛仰二
千載弔古悲荒阡墟墓絕樵採清風激顏頑古道邈難
作悲哉東逝川

顏躅墓

漢初尚黃老儒術闇不彰齊魯誕諸儒五經如載陽遐
哉清河傅卓為羣倫倡抵掌論湯武大義非荒唐曲學
誠孫弘微言詔后蒼訓詞列學官星日同琅琅我生睽
千載桑梓寧異鄉寤寐思哲人流風一何長生慚齊魯

學私淑附師匡

轅固里

奉符古城

國朝

王士禎

我行奉符城不見崑崙迹何處仙人間青山繞長陌唯
聞党竹溪髣髴南邨宅

徂徠山懷石介

國朝

王士禎

雲陰移徂徠影覆汶河水下有賢人居清風被田里一
杯詎能容千秋今廟祀

楊家砦

國朝

王士禎

詰曲皆紅泉縱橫半白石石映月明時泉喧風雨夕愛
此故鄉山臨流布瑤席

甕口峽

國朝 王士禎

岱宗趨肅然陰齊陽則魯中有夾谷臺連峯作門戶石
壁造天關蕭蕭綠蘿雨

登戲馬臺

國朝 徐 夜

晴日美秋辰清郊送寒籜登臺攬遐荒寓目洞寥濶羣
山勢東下迴合抱營薄隱然大國風規觚見開拓歎息

霸圖盡遺跡此顏落朝代閱丘墟人民換城郭由來文物邑風俗緬猶昨夙昔耆舊稀故事久不作撫時悲運流滯境成棲泊遲暮寡所歡淹留亦何樂學仙疑荒忽讀書苦寂寞杯酒等榮名吾道竟安託

同諸友登華不注

國朝 王大儒

看山如讀書熟則刪所戀層折取其新即此窺候變不注近桃溪登臨良我便茲乃獨淹留衆前我則殿細酌眺歸鴻諸峯開面面風日發寒香秋老霜林靖

濟陽宮

國朝
段雲襄

炎祚昔中衰白水真人起不獨春陵城鬱蔥氣可擬維
時南頓君誕聖實我里赤光何赫然嘉禾復蕝蕝於休
銅馬帝威弧殪封豕再覩漢官儀一雪新室恥天心固
厭亂代興乃恒理遙遙千餘年神器亦屢徙吁嗟舊吏
舍莫能名其址緬懷東都盛蹶生此焉始俯仰感古今
濟伏詎終已醉成梁甫吟慷慨徒為爾

濟陰二賢詠

國朝
段雲襄

東晉崇放達翕然事羣屐及當國步艱風流竟何益猗
嗟卞忠貞盡節在宗祏非不愛閒泰常如舍瓦石居官
貴幹實時好安足惜元舅失其御歷陽乃作逆西陵既
摧敗力疾猶鬪格二子亦遙赴同殞青溪柵忠孝萃一
門姓名垂竹帛愚生千載下弔古訪遺跡乘氏有殘碑
冤句無故宅撫今念前哲夢寐感精魄春秋秩祀存祠
宇宜重闢誰能執鄙吝永使浮囂革

卞忠貞壺

士安故早慧七歲即馳譽既領鹽鐵使殫精事軍儲兵

戈方艱食恒憂脫巾呼捉驛及白著宛轉喪溝渠刀鋸
雖在前不足禁猾胥公乃窮利弊盡驅鼠與狐出納委
士人吏惟奉文書悉罷無名斂措置自有餘鞭算權萬
貨鼓吹逐歲輸居然管蕭亞豈若桑孔徒言利析秋毫
取之盡錙銖民生日以促國用何能舒偉矣常平法萬

世仰嘉謨

劉尚書吳

新甫山懷古

國朝

王應修

新甫傳聞久登臨始見奇懸崖高截嶺斷石迥參差空

翠羣峯濕微茫一徑危攀藤雲拂袖藉草露沾肌斤盡
魯侯柏苔殘漢武碑山僧聊共話谷鳥暗相窺壁古龍
蛇剝林深麋鹿馳汲泉供茗碗敲火爇松枝寂寞探玄
意淒涼弔古詩滄桑不可問丘壑有餘思

登千佛山

國朝
田雯

出郭二里餘雨晴疊嶂曉杖策只緩行不知入林杪
窈窕松磴細披翦石棧杳振衣最高峰送目皆可了人家
萬柳陰湖面一鏡小鵲華爭峭拔衆峰凌天表佛閣嵌

虛巖蘚徑穿叢篠谷口淨無雲偃仰看飛鳥

孤亭縛山腹中有一指泉淪漪下奔崖遠注如長川斜
日風蕭瑟返景何澄鮮松篁響迴谿冷冷拊清絃灤源
盡洑流茲水乃巖顛老衲揖客入松笋浮厨烟檐花襲
巾幘幽禽鳴我前

華不注

國朝
田雯

水涯如凹白茲山乃撐住一峯矗太清不與衆峰侶離
離螺髻垂翠綠淨可數雨櫛石髮細雲裂松髯補天風

吹我來理策歷半塢
蹠蹠盤徑幽窈窕
花吐企脚筋力微
兀坐思翺舉上界
傳梵鐘採藥控瑤
圃騎鶴伊何人嗒
然聞笑語

昔聞謫仙人曾此一振衣
千仞青芙蓉蕭颯揚清輝
赤脚不可尋烟雨何霏微
御風凌絕頂猿鶴時相依
上接天漢津片石見支機
瑤臺終杳冥日斜照靈旗
安得攜長鏡去劖黃獨肥
散髮俯灤川悠悠素心違

翠微寺

國朝田雯

詰曲歷石齒沿溪樹漠濛招提門何向陂陀無人蹤峭
崕立萬仞惆悵林路窮豈知披榛莽紆迴流水通一僧
出汲水竹肩行相從長綆下深澗割豁驚潭龍淅淅石
湫雨冷冷葛花風前循略約去木杪聞清鐘

鮑山拜叔牙墓

國朝
田雯

窈窕松路深迢遞成孤往雨濕烏角巾花沾紅藤杖遺
跡不可尋但聽樵唱響

由桑落院步至扁鵲祠晚登嵒山

國朝

田雯

繫馬策短筇投憩黃桑院
不見採藥人
犂确石路轉初
夏天氣晴磔磔鳥聲變

柳絮泉訪李易安故宅

國朝

田雯

跳波濺客衣
演漾迴塘路
清照昔年人
門外垂楊樹
沙禽一隻飛獨向前洲去

城東五里小清河南岸拜閔子騫墓

國朝

田雯

菰蘆花未吐菱荷葉已香日夕下山椒歸鴉亂迴翔石
桴在溪側無風響白楊

菜莊觀邊華泉墓碑

國朝 田 雯

溪風吹野棠亂落花如雪惆悵青林間淺山埋片碣晚
天淨無雲萬峰一明月

韓倉訪白雪樓遺跡

國朝 田 雯

直過丁香灣便入韓倉谷谷口閒無人鳥聲媚幽獨蘿
花落長松雨晴如膏沐

丁香灣水名
韓倉村名

柳溝拜李滄溟墓

國朝 田 雯

鞍山平如屋，瓢峯插其傍。
十里茶白河，野水流泱泱。
拄杖步空林，松風吹衣裳。

鞍山瓢峯山名，茶白河名。

四風閘訪辛稼軒舊居

國朝 田 雯

藥欄圍竹嶼，石泉逗山脚。
風流不可攀，誰結一丘壑。
斜陽甸柳莊，長歌自深酌。

稼軒有一丘一壑詞，甸柳村名。

北渚亭拜曾南豐先生像

國朝 田 雯

雲髻攢遠岫，荒祠抱清灣。
舴艋隔浦停，鷗鷺當我還。
萬

頃藕花風收之襟帶間

水面亭南謁薛文清王文成二先生祠

國朝 田 雯

小溪架畧約亭榭如村塢
簌菸數百竿綠籜戰風雨
裴回未逢人停策望遠浦

晚泛白雲湖

章鉅

國朝 紀之竹

湖波漾晚山落日在笭簖
漁舟如瓢大還載孤城影
菰蔣下鵝鵲布颿收舴艋
更羨月明時蘆花一萬頃

遊靈巖寺

國朝徐 亭

岱嶽巨魯封迤邐忽中截劃為東西支元氣此蘊結征
車日紛逐不曉藏奧折我昨登日觀足力未云劣策蹇
鼓遊伴攬勝何勇決入谷兩山翼四望天陟絕豁然開
空蒼嵐翠清可啜石梁通寺門寒流細幽咽殿旁漢柏
二輪困腹半裂散為千萬株儼若瓜孕跽浮圖轟玲瓏
勢敵山巖嶠下有卧佛堂楹砌敞修潔披榛陟荒塗雙
屐險蹉跎頽垣留袈裟紫繡剝積鐵龜趺何代遺雨潤

土花凸徑仄石齒齒崖危樹傑傑稍憇甘泉亭香乳瀉
不竭一掬心神清免使腸內熱白雲蔽峯腰冉冉洞門
洩高攀猥狖枝幽探虎豹穴摩挲開老眼撥蘚讀殘碣
乃知歷魏唐締構本前哲茲寺有興廢茲山無磨滅踏
月休松寮相對泯言說

偕友人游蓮花山

新泰

國朝 周 韓

我懷古新甫涉彼汶水湄行行盡南陌川谷何逶迤遵
路漸深入前望多嶮巇升降須臾間我馬亦已疲休轡

巉巖側梯霞相追隨不覺致身遠但見羣山卑大風拔
雲根神悸心轉危手扶兩僕夫木彊足難移俯臨萬仞
下鳥道空如絲攀緣更數峯煥然豁支提莊嚴奉醫王
丹青間杲愚歷階徧瞻仰長跪禮大慈忽逢羽衣人捧
袂前致詞謂予良辛苦蹈險窮幽竒是山稱蓮華葉葉
交撐持洞府秘靈妙天作仙人居潛真總度世知名獨
安期當年漢武皇訪道親來斯至今西崦土猶是離宮
基聞此長太息恨不生同時向讀方士傳往往參信疑

或云燕齊俗怪迂恒相師豈知踐神境異蹟還累累陋
哉彼夏蟲語冰徒見嗤

望大澤山

國朝 孔尚任

蓬山海上來峰峰氣磅礴羣峭衛一尊巍然見大澤雄
姿既蔚深秀骨復峻削左控渤澥濤右握岱宗絡日月
相蔽虧風雨自橐籥靈竒悶混茫餘妍發丘壑落落挺
長松粲粲羅仙藥丹泉白石間真構隨所托結契含青
華遊目極寥廓何當躡層巔一馭浮丘鶴

宛郡息馬地漢鐘

國朝 孔傳鐸

維漢有名鐘千年愈清響置之關侯祠雜以松風爽饗
饗鑄其腹追蠡在乎上乍扣聲和平再扣音晃朗何能
器永存實以人景仰於論試一奏似有神來往易以吳
魏鐘應知神不享

朱虛故城懷古

管寧故里

國朝 安 箕

赤帝運潛移黃巾禍未息衣冠陽九會四域罹戈戟孰
能知幾神管邴實揮斥冥冥息戈慕遠浮遼海舶一世

白鶴姿半生皂帽客鸞鳳自翱翔蛟龍遁無迹挈家更
歸來土宇未安席操丕封豕流詎肯甘臣役根矩豪雋
人降志稍局脊管公鄙徵命峻節堅金石祇今幾千載
名垂竹素赫伏軾過公鄉精藻寄懷繹水木鬱清佳山
巖環秀碧城郭已丘墟何處尋遺宅緬古企高風雲飛
千嶂夕

愚公谷 臨淄

國朝
安 箕

春岑鬱嶙峋春流碧洄瀕山水盤紆間景物何幽淑結

轡緬昔賢知是愚公谷愚公匪真愚大智沉于陸不願
別己人而況區駒犢舉世斲渾敦至道存枝鹿睠茲岩
壑佳安能結茅屋

望九仙山

國朝
安 箕

巨海納洪流至涯恣光瀦鎔結大地成土石互滌盪膚
盡堅骨出乃成此竒狀或如脫綳笋或如規圓杖或卓
如廩庾或削如屏障金莖爛五色妙鬘聳寶相千仞靈
姑鉞萬尺老石丈雲根無纖埃各挿青霄上何意宇宙

間產斯崛特樣信矣蘇公言奇秀侔鴈蕩探幽日畧移
濟勝襟懷放左攬五蓮峰茁茁出盆盎

謁東方先生祠

國朝 康敬采

懷古景高風浮沉在金馬索米來長安獻策拜廣廈上
林罷營築鑾輿停原野辟戟進陳辭董偃避喑啞海上
迴仙舫始悟方士假寓意非有論客難何瀟灑詞章枚
子儔調高和彌寡悠悠漢庭上誰為知公者遺構厭次
里頰河環其下曉日敞虛楹松籟泉聲瀉歲時薦蘋藻

古壘奠玉罍

范張祠

金鄉

國朝

黃叔琳

道交金石盟世交雲雨態緬懷范張祠寥廓生長喟分
聯生死間氣感幽明際抗義砥狂瀾五常萃天地東京
獸行高兩賢絕攀跂數年踐久要醞酒停驂至拜母肅
升堂孺子延欣侍古歡雞黍餘一夕千秋事生別莽關
河恥誠貫存逝不見故人容但通死友志魂魄墜虛冥
衣冠來夢寐嗒焉忽驚號傷哉闕含襚素車黯西犇應

期及窀穸執紼告長辭形離神豈背剗折一寸心送入
三泉內死者更何須生者真無愧憑棺聽數言今古同
揮涕真氣激頽頽詎在營封瘞淳風一二傳鬚眉儼英
粹不論陳平子妻孥護喪匱不問孔仲山把臂憐忼忼
吾嗟鳴鳥哀谷風道久敝張陳悼凶終蕭朱悲晚替塵
途意氣交銜杯示肝肺利害輒掉頭死生那可計兩賢
卓清標羊左應堪繼俯視車笠徒徵逐爭羶膩當時千
里交茲土同堂祭逡巡委蒿萊良宰勤修治東緡杰士

多感式青雲義潔醴薦肴疏陶陶舊風致九原如復生
萬祀存高致

登日觀峰四首

國朝 王 萃

捫蘿翠濕衣遐睇滄洲曉初日何蒼涼海氣遠縹緲山
高綠濛濛不知幾峰小七十二家封玉簡變烟草會當
解塵纓手弄青未了詖蕩天門開晨飈吹我到

羲和方秉轡峰頂光熹微暍睟簾紫瀾岩巒相因依松
磴亂空碧山禽窺清暉何來遠寺鐘天風是耶非矯首

忘心想迴矚息世機屐聲與石齒下有白雲飛

日上嶽勢尊羅列芙蓉綠羣峰紛來朝蒼靄如膏沐引
領亂峰巔抗策移清旭藻景含林岑疊疊春波縠餘霞
正卷舒朝霏忽斷續萬壑響寒音松花落巾幅

直上四十里呼吸通帝旁荒雞忽一聲今日見扶桑蒸
嵐互瀕洞點黛變晨光雲絮襲我裾嶽色墮我裳登登
下山椒岸幘倚青方我縱丘壑人膚寸豈相忘

松椒山是董樵隱處

國朝 王 革

斷壑隔匿峰修林暗空谷不知春淺深谷口草自綠曾
聞耽隱人此中劇黃獨

三姑臺

國朝嚴曾業

男子生有室女子願有家蒲氏有三女守貞良可嗟築
臺濟水濱養親絕笄珈貧難具甘旨力足供桑麻父感
三女德臨終命靈車窻視馬所止幽扉閱泉沙至今三
臺峙屹然形勢佳貞風與孝思千古同高霞却憶寡婦
清秦臺漫奢華翻多金穴富累及顏如花何如蒲氏女

潔白無疵瑕過此令人歎春風薦芹芽

泰山紀遊

國朝 趙國麟

辛卯四月十一日同金子枚仲韓子公度門人侯
長麓張漢張黃子壯黃健菴登岱宿登封臺十二
日徧遊岱頂下後石屋十三日登九龍崗至大燭
山仍宿後石屋十四日由伏虎門下仙鶴灣至艾
窩而歸作詩百韵紀事

我家泰山下賦性耽巖谷晨夕對不厭春秋時往復茲

辰值首夏高興倍疇昔童冠六七人登臨豈辭數髯翁
同予癖加以長顧陸退之偕籍喜能詩無撰錄江夏大
小阮攜琴致不俗杖履發青巖後先步趨起列嶂懸青
霄錦屏映晴旭層閣聳山腰丹扉帶支麓出郭尚陂陀
入雲自茲俶回睇見徂徠羅羅指邊幅過訪白驪塚流
覽萬仙閣茅茨高下安櫻桃參差熟迤邐度水簾紆折
歷雲壑遙望白石亭金經鐫山腹何人歇馬崖長風撼
古木憇足登仙臺玉虛宮殿肅路轉踰黃峴一屏障全

嶽芙蓉插雲端始見真面目峯雲互吐吞松石爭盤礴
怪秘呈形模移步換頭角或若髻旋螺或若笠覆箬或
若巾岸幘或若冠鐵幘或奮若翼張或怒若爪攫靜或
若獅蹲動或若龍躍翩或若鴻驚叢或若蜎縮或離而
欲奔或聚而欲觸升者雲為階墜者雲為絡立者雲為
帶卧者雲為幄奇幻勞應接徘徊恣領畧振衣彌高巖
罡風吹謾謾一線通天門何年巨靈鑿雙巖蔽日月仰
窺天一束崔嵬疊壁壘巉峭森劍鋸斧劈與刀皴披麻

連解索寸膚不着土萬仞皆刀斲其陽盛瑤葩其陰積
氷電倏忽異氣候烈日不能虐鐵鑠雲中垂猿攀額頻
蹙前趾後目覩後冠前履蹴望邇行彌遠身進足反却
屏氣慎登陟忽若出囊橐直凌登封臺浩歌震列宿詩
追太白篇圖倣叔明軸豪飲吸川鯨高談炙車轂醉看
月蟾沉卧聽天雞喔曉起失萬山空濛雨露霖須臾土
囊來蕩漾雲霧廓東登日觀峯扶桑逗光昱海水映遠
岫晶盤盛碧琰南上仙人橋三石鬼工斲衆山勢汹湧

翠浪長空泊西到南天門立石無倚着雲氣盛苔蘚飛
白鴻都堊北立玉皇巔羣峰總臣僕此山帝王尊萬乘
紛馳逐摩挲無字碑歎息開元作銘德並紀功函泥更
緘玉金石志綢繆風雨半殘剝更陟吳觀峰練馬終渺
邈彌殷仰止情倚杖思孔卓舉頭已天外萬古胸懷拓
凌虛與倒景神仙馬可學探幽且盡奇莫使山靈喙陰
洞名黃花靈區富蘊蓄綠澗挹空翠滿路聞異馥到門
鐘磬靜依山樓閣簇石竇滴瓊漿羽冠獻芝粥雲收皓

魄迥天空沆漑漑枯桐鼓杳淼靈籟答肅穆夜色沉幽
夢晨光換新局蔚藍浸青葱翠微染黛綠千松與萬松
小燭共大燭照天松作燄插地山為托既覽九龍勝更
尋雙鳳樂蒼髯張偃蓋珠蕊結瓔珞山川供品題天地
任嘯詭曠懷古今空遐覽塵世促一宿使神凝再宿使
神足何時結雲樓長此蠲榮辱歸興賈餘勇桃源問津
錯匍匐踰伏虎戰兢過仙鶴上登愁跛牂下度懼猱獮
亂山鳥獸寂深澗峯巒直聳攀崖擲琪草失路冒叢樸李

後心徬徨阮迷行予于樵子度蜀道同人會淇澳搜奇
四日遊詎比謝公躅吁嗟歸路難頗似昌黎哭高步防
傾危悲歡恒倚伏乃知造物心所忌暢吾欲尚平志雖
賒茲遊亦陵鑠回首望龍嵒烟霞染佩服稱宗鎮青方
鄉土信所獨到廬意拳拳賦詩酒重酌忽夢九天遊閭
闔聞仙樂齊州九點烟俯視不盈握豈惟天下小泰山
止一粟啟戶瞻巖巖恍然似有覺

登鵲山叢林閣遠眺

國朝

朱懷樸

濟樂來王屋九點峯楚楚碧谿縈寺門石瀨濺寒雨上
方秋氣深雙樹映孤嶼初地意蕭寂古篆留紺宇巖壑
靜塵心松竹護茶塢幽禽鳴空林黃葉積廊廡涼風送
夕景搖曳塔鈴語

遊華不注

國朝 朱 紉

東風騎馬來出郭二三里取路入峪岢蒼翠拔地起濕
嵐撲春衣小橋列雁齒巖邊看飛帛千尺溜雪髓天際
螺髻青石上苔錢紫山境隨處佳誤到亦可喜小廟掩

紅扉寂寞桃花裏扣門逢僧雖就坐施蒲倚山伴三五
徒竹杯傾婪尾幽磬一聲來深林醒醉耳起視舜子城
亂烟隔山背

麻姑堂

國朝 朱 湘

赤輪纔西斜言過齊東縣古祠倚高崖十里雕甍見入
門迤迤行老柏擁深殿殘碑巔扇蹲籀書留一片拭眼
捫讀之舊記誰所撰我懷麻姑仙採藥丹鼎煉飄飄駕
黃鶴雲旗伴星扇胡為此餉軍

相傳唐太宗征遼
姑曾餉軍于此

無乃

近齊諺征衣一抖擻再拜浣塵面白日聚羣靈森森毛
髮顫幽磬烟際長鳥呀雨餘變婆娑綠槐陰就之施方
薦僧厨供晚炊試嘗胡麻飯

鄒縣謁孟子廟

國朝 汪援甲

峩峩嶧山秀萬仞凌蒼穹篤生孟夫子間氣所獨鍾三
遷承慈訓俎豆習禮容道一結真契性善豁羣蒙辯息
楊墨熾笑黜桓文雄虛生名世才一德誰與同我來驅
車過入廟尋遺蹤堂楹閔以肅檜柏羅青蔥更觀天震

井湛碧寒泉通客行乏溪毛載拜致恪恭俯仰有餘慕
穆然來清風

登掛劍臺

國朝峻德

我來桃丘城言訪徐君墓緬昔挂劍人殷殷不忘故高
義挽頽風千金何足顧于時仲冬節寒冰淒薄暮四野
浩茫茫大河日東注一唱徐人歌悲風激高樹

七言古詩

贈兗州孟都督

唐韓翃

少年親事冠軍侯，中歲仍遷北兗州。
露冕寧誇漢車服，下帷常討魯春秋。
後齋草色連高閣，事簡人稀獨行樂。
閒心近掩陶使君，詩興遙齊謝康樂。
遠山重疊水逶迤，落日東城閒望時。
不見雙親辨豐膳，能留五馬盡佳期。
北場爭轉黃金勒，愛客華亭賞秋色。
卷簾滿地鋪毬毬，吹角鳴弦開玉壺。
願學平原十日飲，此時不忍歌驪駒。

舜井歌

宋 歐陽修

岸有時而為谷，海有時而為田。
虞舜已歿三千年，耕田

浚井雖鄙事至今遺跡還依然歷山之下有寒泉向此
悲號于旻天無情草木亦改色山川慘澹生雲烟一朝
垂衣正南面臯夔稷契來聯翩功名德大被萬世今人
過此猶留連齊州太守政之暇鑿渠開沼疏清漣遊車
擊轂惟恐後衆卉亂發如爭先豈徒邦人知樂此行人
亦為留征軒

次韻章傳道喜雨

禱常山而得

宋蘇軾

去年夏旱秋不雨海畔居民飲鹹苦今年春暖欲生蠓

地上戢戢多於土預憂一旦開兩翅口吻如風那肯吐
前時渡江入吳越布陣橫空如項羽去歲錢塘見飛蝗
自西北來極可畏農夫拱手但垂泣人力區區固難禦
撲緣駿尾困牛馬啖齧衣服穿房戶坐觀不救亦何心
秉畀炎火傳自古荷鋤散掘誰敢後得米濟饑還小補
常山山神信英烈麾駕雷公訶電母應憐郡守老且愚
欲把瘡痍手摩撫山中歸時風色變中路已覺商羊舞
夜牕騷騷聞松竹朝畦泣泣流膏乳從來蝗旱必相資

此事吾聞老農語庶將積潤掃遺孽收拾豐歲還明主
縣前已害八十斛率以一升完一畝更看蠶婦過初眠
未用賀客來旁午先生筆力吾所畏感踏鮑謝跨徐庾
偶然談笑得佳篇便恐流傳成樂府陋邦一雨何足道
吾君盛德九州普中和樂職幾時作試向諸生選何武
再過超然臺贈太守霍翔

宋蘇軾

昔飲雩泉別常山天寒歲在龍蛇間山中兒童拍手笑
問我西去何當還十年不赴竹馬約扁舟獨與漁蓑間

重来父老喜我在扶攜老幼相遮攀當時襁褓皆七尺
而我安得留朱顏問今太守為誰歟護羌充國鬚未斑
躬持牛酒勞行役無復杞菊嘲寒慳超然置酒尋舊迹
尚有詩賦鑱堅頑孤雲落日在馬耳照耀金碧開烟鬟
却淇自古北流水跳波下瀨鳴玦環願公談笑作石埭
坐使城郭生溪灣

登州海市并序

宋蘇軾

予聞登州海市舊矣父老云嘗出于春夏今歲晚

不復見矣予到官五日而去以不見為恨禱于海神廣德王廟明日見焉乃作此詩

東方雲海空復空羣仙出沒空明中蕩搖浮世生萬象
豈有貝闕藏珠宮心知所見皆幻影敢以耳目煩神工
歲寒水冷天地閉為我起蟄鞭魚龍重樓翠阜出霜曉
異事驚倒百歲翁人間所得容力取世外無物誰為雄
率然有請不我拒信我人厄非天窮潮陽太守南遷歸
喜見石廩堆祝融自言正直動山鬼豈知造物哀龍鍾

信眉一笑豈易得神之報汝亦已豐斜陽萬里孤鳥沒
但見碧海磨青銅新詩綺語亦安用相與變滅隨東風

和李邦直學士沂山祈雨有應

宋蘇轍

宿雪雖盈尺不救春夏旱吁嗟遍野天不聞歌舞通宵
龍一戰旋開雲霧布旌旗復遣雷霆助舒卷雨聲一夜
洗塵埃流入溝河朝不見但見青青黍與禾老農起舞
行人歌汗邪滿車尚可許供輸到骨期無它水行天地
有常數歲歲出入均無頗半年分已厭枯槁及秋更恐

憂滂沱誰能且共蛟龍語時布甘澤無庸多

題靈巖

宋 鮮于侁

馬煩篳策車馳轂終歲塵勞常碌碌喜聞巖寺在山中
路轉清溪入幽谷乍行山口疑洞天窮深一上翻平田
千層臺殿隱林木四面石壁生雲烟山僧迎門笑相揖
為語祖師存德迹屈指于今八百年已在西來達摩前
鶴鳴飛止黃金地錫杖湧起清涼泉境稱四絕名天下
天台石橋乃其亞千峰不改歲寒時一水竄憐秋月夜

半生遊學頗艱辛
且向空山老此身
也知方丈安禪處
解笑東西南北人

醴泉歌

宋張元孝

君不見齊城城西范公泉
曾照當年范公影
范公一去不復返
異時此地成佳景
先賢口澤氣尚存
甘棠遺愛誰能並
貌公遺像龕公泉
千年恒對佗山嶺
惟有此山見此公
後樂不廢林泉景
古來豪傑宦轍經
山川草木皆引領
不獨照耀翰墨光
抑且品題丹青炳
顧予昔忝

宗伯省諧世無術傷骨鯁一年謫官此羈棲數向寒泉
挽修鯁冰壺日日漱瓊液涓滴解使心常醒平生頗味
海內水此與金山可並騁膏澤定有鬼神護清流自與
乾坤永忽復飄然當去茲泉聲引韻若為哽坎注詎測
源流深鳥鵲空噪梧桐冷君不見古人飲水必廉泉臨
流洗耳須清潁嗟哉此水可洗心往來祠下宜深省

弔顏魯公

宋文天祥

平原太守顏真卿長安天子不知名一朝漁陽動鼙鼓

大河以北無堅城君家兄弟奮戈起一十七郡連夏盟
賊聞失色分道遁不敢長驅入咸京明皇父子得西狩
由是靈武起義兵唐家再造李郭力賊臣牽制公威靈
哀哉常山慘鉤舌心皈朝廷氣不折崎嶇坎坷不得去
出入四朝老忠節當時幸脫安祿山白首竟陷李希烈
希烈安能遽殺公宰相盧杞欺日月亂臣賊子歸何所
茫茫烟草中原土公死于今六百年精忠赫赫雷行天
靈巖次鮮于頔韻

金勞堪

靈巖突兀方山曲古殿般舟枕巖腹石鐙層盤林莽中
芙蓉面面羅青峰菩提花散諸天雨蒼筤風傳萬壑鐘
玄烟一鶴踰躑下巖自點頭泉自瀉袈裟金藏不知年
飛錫猶在西來前披襟向月聊放歌聲徹明河東壁寒
閒雲紛落如相顧我欲從之入天路

登岱

金元好問

泰山天壤間屹如鬱蕭臺厥初造化手劈此何雄哉天
門一何高天險若可階積蘇與累塊分明見九垓扶搖

九萬里未可誣齊諧秦皇憺威靈茂陵亦雄才翠華行
不歸石壇滿蒼苔古今一俯仰感極令人哀竒探忘登
頓意愜自遲回夜宿玉女祠崩奔湧雲雷雞鳴登日觀
四望無氛霾六龍出扶桑翻動青霞堆平生嵩華遊茲
山未忘懷十年望齊魯孤雲拂層崖青壁落落雲間開
眼前有句道不得但覺胸次高崔嵬徂徠山頭喚李白
吾欲從此觀蓬萊

華不注行

元
郝經

崑崙山前半峰碧海風吹落猶帶溼意氣不欲隨羣山
獨倚青空迥然立平地拔起驚孱顏劍氣勁插青雲間
濟南名泉七十二會為一水來浸山我来方作鯨川遊
玉臺公子邀同舟君山浮嵐洞庭晚小孤滴翠清江秋
酒酣興極烟霏昏魚龍慘淡迴山根少陵不来謫仙死
舉杯更欲招其魂魄兮不来天亦老元氣崔嵬山自好
超超絕頂凌長風注目東溟望蓬島

使宋過濟南宴北渚亭

元 郝 經

往年薄遊宴渚亭高秋霜落波光清今年持節又來宴
菱葉荷花香半城城南倒插泰山脚城北汎涵海氣橫
周圍盡浸樓臺影魚鳥慣聞簫鼓聲錦堂流出珍珠冷
花應漂搖碎光炯名泉多在府第中繡簾深掩臙脂井
推波委濤到北渚滙蓄涵渟數十頃虹橋桁柳平分破
巨壑雲莊入烟暝濟南名士多老成行臺突兀皆名卿
尊中正有李北海坐上寧無杜少陵堰頭臘瓮滿船求
歌舞要送行人行江南風景已不殊渚亭即是西湖亭

雲屯山

元丘處機

雲屯山雲冥冥天風動搖飛雨零神奇幻恠不可測千
變萬化無常形雲收雨霽杳無迹但見羣山羅翠屏山
高谷深復何有白石磊磊松煙青春風浩蕩滿山谷直
上似欲超天庭心虛目極淡天闊睨視漠漠環滄溟昔
居菴地走三郡今為洞天朝萬靈虛空舊基作新觀萬
世不朽傳佳名

濟州原上

元周權

朔河春透水未裂黃蘆伐盡洲渚闊荒祠老棟壓欲頽
古樹無枝枯復活長嘶飛騎抹流雲草舍微茫聚疎樾
夕陽返景低黃埃漠漠平沙浩如雪

孔道輔擊蛇笏

元趙孟頫

以笏擊蛇有孔公義與段公擊賊同事之鉅細雖有異
正氣憤激生于中偉哉孔公聖人裔豈聽妖邪亂民志
即今槐木一尺強氣象凜凜含風霜子孫守之慎寶藏
絕勝象牙堆滿床

咏嶧山

元 趙孟頫

東方巨鎮宗岱宗羣山列峙臣妾同西南崛起一萬仞
却立不屈如爭雄何年天星下天宮墜地化作青芙蓉
外如削刻中空同閭風瑤圃遙相通我昔東遊訪青童
羣仙邀我遊東峯悔不絕粒巢青松失身誤落塵網中
如今可望不可到艤舟空羨冥飛鴻神仙可學事亦晚
安用屑屑悲秋蓬吾聞嶧陽有孤桐鳳凰鳴處朝陽紅
安得跼為寶琴獻天子解慍歌南風

題管幼安濯足圖

元劉因

漢家無復雲臺功生平不識大耳公眼中天意鏡中語
此身只有扁舟東諸公亦英雄百年能辦山陽封歸來
老栢號秋風世路悠悠七十翁乾坤故物兩足在霜海
浮雲空復空無刀可斷華太尉有死不為丕太中丹青
白帽凜冰雪高山目送冥飛鴻為問蘇家好兄弟萬里
北海誰真龍

孔林瑞槐歌

元迺賢

闕里陰陰槐樹古百尺長柯挾風雨密葉蟠空擁翠雲
深根貫石流瓊乳蒼皮皺蝕紋異常天成篆籀分毫芒
游絲縈錯蚪蚪亂雲氣飛動龍鸞翔羸秦書焚士坑僂
幾嘆遺經藏壁屋千年聖道復昭明喜見文章出嘉木
神明元胄嗣上公雨露滋沐深培封清陰如水石壇靜
彈琴樹應歌薰風

奉題伏生受書圖

元楊維禎

瓜丘崩蚪蚪藏典墳孰求楚左相金絲未壞孔子堂濟

南老生教齊魯綿蕝禮生何足伍挾書嚴禁禁未開盤
詰誰能禁齊語百年禮樂當有興天子好文開太平百
篇大義喜有託十三女口傳嚶嚶太常掌故親往受百
篇僅遺二十九河內女兒還自疑老人屋中有科斗建
元博士孔襄孫五十九篇為訓文嘉唐悼桀空有詔孔
氏全經誰與論倪家書生能受學一篇薦上原非樸賞
官得列中大夫帝軌皇塗未恢擴漢家小康黃老餘烏
用司空城旦書蓋師言治在何處後世徒走陳農車

殺虎行為劉平妻胡氏作

詳列女志

元楊維禎

夫從軍妾從主夢魂猶痛刀箭瘢況乃全軀飼豺虎拔
刀誓天天為怒眼中於菟小于鼠血號虎鬼冤魂語精
光夜貫新阡土可憐三世不復仇泰山之婦何足數

咏騶虞詩應制

明胡儼

永樂十一年夏五月騶虞見于山東之曹縣六月
丁未朔守臣以進白質黑章惟性而馴徵之載籍
實為瑞獸乃太平之嘉應也

聖皇端拱居明堂梯航玉帛來萬方仁恩義澤被寰宇
運化熙熙躋虞唐於此山東產靈獸玉燭儲精天降祥
雪花英英瑩毛質玄雲冉冉凝天章不履生芻性仁厚
虎豹遁迹蛟龍藏千巖萬壑生光彩山靈岳祇參翱翔
奇花異卉紛照耀靈風滿川甘露瀼要之網羅不可致
虞人走告誇非常近之不驚亦不懼儀儀穆穆行踴踴
薦以雕籠藉芳褥榮光協氣隨飛揚猊首斑斑獻金闕
龍旂寶扇森開張百僚拜舞慶嘉瑞金鳴玉趨鴈行

昔者釣州已來貢重見實由聖德昌小臣忻躍載歌頌
願播簫韶儀鳳凰

鵲山湖送李憲副

明邊貢

齊門東沙逕平雲漠漠湖冥冥使君來來麥秋晚柳陰陰
畫舟遠瘦蒲疎荇逗遛香南浦烟光接西堰堰北山靈
鳥相聚對面潺湲華不注山前綠稼隱茅茨舊是齊儂
釣遊處橫橈越水滸飛踏青芙蓉華陽洞口跨白鹿醉
吹玉笛呼眠龍長鋪野老逐李邕錦袍仙人隨赤松石

壁土花秋靡靡古蹤悠悠鎮如此要留灑翰洗蛙蟬滿
林夜黑啼山鬼

逼除過古史水江山人同賦

明 李攀龍

夜來北渚北風急打頭雪花大如笠片紙東飛右史書
詰朝小作湖中集到門白鳥出高巢繫馬南山迸人入
使君亭中未解醒肅客登筵一長揖地僻無無俗子妨
樽空況有鄰家給意氣還須我輩看功名但任兒曹立
瞥眼旋驚青歲徂沾唇莫放金盃澀世上悠悠已自諳

即今不飲嗟何及醉聽楚調起寒雲綵筆憑陵朱絲濕
平生多少伯牙心此日因之寄篇什

題瓠子河

明謝榛

金堤重到感秋風瓠子猶思漢武功雉堞遙連千樹暝
龍珠不見二潭空菱荷老盡青霜後簫管寒催落日中
白髮滄洲幽事在黃花綠酒故人同謝安自信遊山劇
潘岳誰憐作賦工無數峰巒秋色裏高歌相對欲爭雄

嶧山歌

明于慎行

岱宗海上來西塞中條路東南數峰青未了凌波且涉
長河去欲斷不斷走勢迴結作芙蓉掌上開青冥浩蕩
何年裂平地湧出金銀臺名山固多奇此山奇欲絕累
累萬古石谿衍成竇穴落星不到地累丸不到天懸圃
亦已碎羣玉亦已顛金華牧兒何婉孌一入紫煙無日
返世人誰復叱羣羊坐看蹄角生苔蘚人行石中何盤
珊十步九折穿嵌巖顧見雜花開綺繡又聞淙淙泉水
聲鳴環千峰冥密萬壑逼日光時向天窻滴深林已盡

鳥不鳴攀緣猶訪白雲迹白雲在天何時還洞門石扇
開天關五花峯頭一騁目飄如乘虹駕鶴飛出天地間
但聞長風颯颯萬里至使我四顧開心顏君不見滄海
桑田年歲改秦皇片石今安在萬騎千乘化作灰河聲
依舊東流海沉吟此事心欲飛擊節高歌自振衣空憐
世上浮沉子白首紅顏何所歸

泉林歌

明
于慎行

漏澤萬頃波澎湃如萬馬陪尾鎮之不得溢醜為靈瀆

出其下洞門噴薄瀉流泉沸珠迸玉聲潺湲天山雪花
四月落片片吹上春衣寒拍浮大白相對飲綠蘿作簞
石作枕金潭百尺映丈石熒熒細濯巴江錦行盡回溪
地轉偏疑是鏡湖春水旋深林蔽虧不見日但聞雜樹
多鳴蟬樹裏泉聲百道重木根詰曲盤虬龍解衣羅坐
汎流羽天光水色何溶溶遠峰隱見烟嵐滅殘霞飛丹
手可掇此時林壑暝色來呼酒彈琴望雲月月上青山
醉若何臨流垂手揚素波且歌白石吟綠水紅塵萬事

空蹉跎日出高林送客子清風四面松聲起石橋一出
到人世武陵桃花空流水

日觀峯歌

明
于慎行

岱岳峯頭一片石天光杳杳搖空碧
我來夜掃石上雲未明看見海中日
日出海東幾千里茫茫不辨雲與水
天雞啁啾海上啼天邊霞氣半邊紫
忽然激灩玻璃翻一泓捧出赤玉盤
長繩斜挽不得上半時方到扶桑巔
扶桑枝葉成五色海水明滅一線白
日東雲氣如連山

日中欲識鮫人國，平明日高海水乾。
滿天翕艷紅氣團，三山金闕流安在。
六鰲背骨秋霜寒，憶昔秦帝東封年。
欲浮海水游靈仙，驅石作橋不可涉。
金支翠羽空西旋，幾時得見海中出。
日三千丈脫屣妻子如浮烟，眼前朱
生信豪士，側帽大叫石上眠。我亦欲取
巨石填東海，揮戈且止羲和鞭。六龍不
停日如駛，仰天嗚嗚酒熱耳。

登太白樓

明屠隆

任城東邊濟水頭，重陽南陌鳴鴈鳩。
王孫三五騎紫騮，

嬌女二人彈箜篌竹葉到手那復留桃花向人勸未休
高城富貴多王侯駙馬都尉大長秋羅衣朝映珊瑚鈎
寶扇夜上木蘭舟繁華零落隨嵩丘姓名滅沒不可求
白也一為脫綺裘任城至今存酒樓當胸磊塊六合收
絲毫淋漓元氣浮凭欄雙目送汀洲滄溟浩蕩齊州一
點如輕鷗手持北斗大酌銀河流織女渴死黃姑愁樓
中之人去不返樓外斜陽又將晚青天碧海無人管繡
箔珠簾為誰卷江頭墓花野風浣估客登樓月光滿依

舊金樽催玉板使我對之心欲斷人生何疾箭何緩奈
何不飲仰天蹋地成悽惋吾聞紀叟善釀埋土灰千秋
零落生荒苔日月不照松花開人間已銷金雀觥地下
仍餘鸚鵡杯白楊颯颯神火來公與何人沽夜臺公乎
公乎喚不回酒樓愁絕空崔巍

嶧山歌

明 李化龍

大石輪囷如象卧小石怒張如虎坐百千萬億疊成山
遍體玲瓏皆可過憶昔女媧補天時煉石為丸手弄之

神功已畢棄之去風吹雨洗到今茲不然共工觸不周
天柱一折石亂流帝遣六丁移置此時共泰山為博籌
其陽有孤桐其陰有浮磬靜夜擊清聲依稀猶可聽披
蘚尋古碑迷茫竟誰是李斯小篆已無踪秦皇頌德徒
為耳白雲之宮白雲連五華之高高造天側身踞石望
東海彷彿玉樓金闕吐蒼烟回身入窰奧途遠不可到
萬轉千迴路忽迷盤蛇一徑誰能造此中耐可絕人羣
何須更問商山雲但恐塵緣割不斷空對蒼崖揖紫氛

夕陽欲下山欲住無留處興來聊取數石歸袖中袖得
嶧山去

沂山瀑布

明公 鵬

北海先生愛名山攜余同看沂山百丈之飛泉五嶽之
外有副嶽東西兩岱同巍然飛泉上從絕頂出凌空中
界兩山間誰使岷江能逆折誰取龍門為倒懸陽侯鼓
勢直奔海列缺垂光橫亘天巨靈手挽漢津落箕斗移
向巖石邊吳門練影千萬丈挈來倒掛齊都前不知香

爐在何處恍然身上匡廬巔晴空白晝無纖翳雷聲砰
礚響重淵滴瀝如絲渟如霧垂珠餘沫流濺濺我來四
月雨初霽草綠松青生紫烟飛瀑豁心風滿耳爽如秦
人酌我桃花源脫帽振衣聊四望員嶠蓬萊如可攀醉
傾醇酒向君笑靜掃松枝石上眠

南旺桃河行

明
謝肇淛

堤遙遙河瀾瀾分水祠前卒如蟻鶉衣短髮行且僵盡
是六郡良家子淺水沒足泥沒胫五更疾作至夜半夜

半西風天雨霜十人八九趾欲斷黃綬長官虬赤鬚北
人騎馬南肩輿伍伯先後恣訶撻日昃喘汗歸蘧蔭伍
伯訶猶可里胥怒殺我無錢水中居有錢立道左天寒
日短動欲夕傾筐百反不盈尺岸傍濕草炊無烟水面
浮冰割人膝都水使者日行隄新土堆與舊岸齊可憐
今日岸上土雨後仍作河中泥君不見會通河畔千株
柳年年折盡官夫手金錢散罷夫未歸催築南河黑風
口

伏生祠

國朝
施閏章

祖龍烈燄燔天地斷簡殘編盡捐棄諸儒白骨成丘山
倉頡史籀夜垂淚上蔡李斯甘罪首忍使萬古斯文墜
天遺一老在人間火燃不到胸中字須臾赤帝重瞳來
阿房一炬咸陽灰表章經學漢文出詔求蝌蚪驅陰霾
是時先生耄且病以口代手鴻濛開五十八篇尚書備
配享立廟何崔巍我来再拜心徬徨側身涕淚沾衣裳
避秦博士窮獨叟姚虞三代今未亡龐眉碧眼冕服古

丹青滿壁生光芒有女披繡珥明璫受書晁令拱其旁
豐碑古篆不可詳諸生俎豆歌樂章靈旗髣髴來翱翔

超然臺

國朝
施閏章

昔讀東坡記夢憇超然臺夢中靈蹟多滅沒乘風愴怛
心徘徊豈知躡屐十年後故人天末同銜杯曉烟漠漠
天將雨城頭秀色為予開浮雲一洗萬峯出縹緲如鳬
海上來俯看苑圃雜丘壑欲尋杞菊穿蒿萊風流太守
丹青在掀髯極目真悠哉逍遙之游亦如此何必求仙

去不回君不見秦皇空上琅邪臺斷碑剝落成飛埃千
秋輦道埋荒苔

觀海市 有引

國朝 施閏章

余校士東牟思見海市事竣謁海廟因禱焉翼日
臨發海市適見歌以紀之

蓬萊海市光有無仲冬物色誇大蘇我亦再拜乞海若
願假靈蹟看須臾是時苦旱海水竭神龍困嬾枯珊瑚
鼉鼓忽鳴津吏咤天吳出舞蛟人趨大竹盈盈橫匹練

小竹湛湛浮明珠方員斷續忽易位明滅低昂頃刻殊
列屏複帳閃宮闕桃源茅屋成邨墟沙門小島更奇絕
浮屠倒影陵空虛有時離立為兩人上者為笠下者車
砦然雙扉開白坂中有琪樹何扶疎三山十洲一步地
羣仙冉冉來蓬壺神搖目眩看不定惜哉風伯為驅除
人間快意亦如此浮雲長據胡為乎噫嘻浮雲長據胡
為乎

遊泰山後黃華洞

國朝
任俠

青遮黛擁烟巒衆紫迤紅迎霜葉動路轉松陰絕壁開
白雲送入黃華洞水沉香盡博山開玉笙縹緲聲如夢
洞邊乞取石田耕我來試覓胡麻種

南旺分水行

國朝 陳廷敬

導淮桐柏會泗沂東流于海禹所治趙宋黃河決而南
淮與泗沂兼併之河於中土一大物况挾衆流行恣睢
爾後六百有餘載多為世患違津涯吳艘越舶亘天來
神京陸挽人驢疲偉哉馮生伏下軾建言為國陳良規

宋公舉事不漫浪下采羣議褒參裨是何老人白其姓
厥名曰英超等夷銅壺倒景測累黍玉尺量地窮四維
河灣接流二十里北走千里誠一奇我行南旺分水處
此豈地利皆人為百川朝宗盡東下却與西北浮雲馳
君不見漢漕山東百萬粟更歷砥柱多險巇又不見唐
挽江淮道汴洛濁流惡浪紛追隨泗沂實與汶水合禹
跡不湮勞川師洪河注水寧有二細流不擇成大陂古
來萬事亦如此短歌微吟風連猗

魚臺東境山水

國朝 陳廷敬

好山過客不知名，好水圖經不入選。
我行魚臺山水間，輕綃半幅平如剪。
連峰依人行欲近，翠嶺橫天去復遠。
山青水綠畫新就，邑人宴坐却掩卷。
東行若更見麻姑，不問蓬萊水深淺。

虎頭崖觀奇石歌

國朝 王士禛

虎頭之崖渤海隅，共言奇絕天下無。
我聞數思褰裳去，風塵羈紲空嗟吁。
昨者得暇事幽討，海風十里吹眉鬚。

到來拄杖沙壩側周顧果爾形模殊橫堆數拳紫鞋鞢
斜迸十丈黃珊瑚更有怒貌如雷勢欲突碧者翡翠蒼
鷗鵠宛如楊氏五花隊紛然竒錯麗且都又如夫差黃
池陣如火如墨還如茶側聞羸皇鞭石渡海水秦橋如
拍通羸壺如何此石偃蹇龍宮鮫室側咫尺不受神人
驅吾家遊囊嶽圖舊閣幅署名記是藍田叔嶽色各各
隨其方青玄朱白中黃簇無乃妙畫果通靈風雨奔騰
向山麓野人有圃郊郭東殘山碣石開玲瓏安得愚公

移此去班然互峙荒庭中

遊雲峰山歌

國朝 王士禛

秋日尋幽橫短策越嶺穿谿度荒陌逶迤十里到雲峯
危巒矗起坡陀脊數折乃及山之坳雙闕巉巖巨靈拆
蒼壁苔侵翡翠斑丹崖日射珊瑚赤傳聞鄭公昔此栖
至今岩壑多遺跡黛畫蚺蜥鬼物阿白雲縹緲神仙宅
吁嗟此事逾千載剝蘚披榛感疇昔穿闕而南西北上
巉曲螺盤徑逾窄振衣輾轉歷巖岑習習天風吹兩腋

傳聞上有九仙蹤
題名猶泐巖間石
為憶雲霞卷靄時
黃鵠青鸞飛幾隻
捫薜攀蘿造極巔
軒軒似有排天翮
莽蒼大海決皆入
夕陽半壁波濤白
魚龍鼉鬪纏滲沱
天吳紫鳳紛騰擲
發狂大叫嘆奇絕
鑿落欲浮千琥珀
眺遠徘徊意不盡
耽奇躑躅情仍劇
暮隨栖鷗下巘岵
笑渠一朵烟中碧

青石關

國朝

葉方恒

兩壁插天中
一線人從石縫窺
天面山頭倒樹掛
飛雲

山脚流泉奔急箭夾谷當年應是此雄關百二強齊塹
往來莫視作滄桑夫子之名天不變

蒙山出雲歌

國朝

曹貞吉

新安黃海天下奇東蒙出雲差似之我來恰當春暮時
上巳已過清明遲萬山一氣無端倪如馬如日不可知
絳衣掩映何歲蕤化為蒼狗空中馳欲行不行司者誰
欲斷不斷微風吹陽氣鼓盪驚躡縱橫列缺無王甌
八荒霖雨天無私我聞貝闕光陸離天吳海若夾水飛

蜃樓閃爍千虹蜺城郭人物靡不為閨婆隱現波瀾瀾
觀河面皺悲酸嘶我有大腹一鷄夷竟須引滿金屈卮
醒來紅日窺東籬

趵突泉歌

國朝 田雯

十年不到趵突泉今夕觀泉頗詘蕩乍聽只疑地肺坼
坐久如聞江鼉漲澄泓一池竹樹深吞納千溪亭榭曠
憑陵叫嘯衆山響迸落簷光劈高浪白髭道士前致詞
七十二泉各殊狀獨有趵突絕神奇王屋倒瀉夸娥創

崩裂不聞海髓乾噴薄直從石竅上軒轅張樂列笙鏞
白蛻掉尾飲甕盎樂源百脈皆洑流此水不知安歸向
鵲華屹立四扇開面面諸峯作屏障我聞道士說泉源
塵壒掃除神色玉岸幘振翮思騫騰如御樵風吹五兩
錢塘勁弩射潮回廣陵夜雨聽濤壯况自千佛巖頂歸
春風綠酒供行帳波紋凌亂菡萏出山脚斑駁桃花放
及到此泉已昏黑冷冷月色照衣桁有客登樓蹋白雪
何人吹笛送高唱陂陀犂确泥路滑橋邊一鶴行相傍

歷下亭詩

國朝 田雯

歷下亭子歷山根七十二泉流到門垂楊四圍插百本
藻紅菱碧波沼翻符簷縛窻似圓笠石子鋪地三重軒
夏木綠陰不可唾鳥語格磔爭飀喧黃鸝顏色絕可愛
啞婉百轉舌莫捫如與佳客坐風榭留連夕話清且溫
此亭撐撐幾千載飽經劫火難具論李邕杜甫不復作
何人北顧傾壘搏架壑嵌巖覲今日蒼木怪石凌朝暾
濟南名士自不少上追騷雅才飛騫華不注峰立東郭

十里直接韓倉村更有邊許號詞傑
摒擋剪紙招吟魂
我思醉眠亭子上溪光嵐影相吐吞
忽忽歲月熟羊胛
移家鵲湖多食言樂源泉尾尋水派
抽函窮搜酈道元

清涼寺雙檜歌

國朝
田雯

清涼破寺古佛國中有雙檜幽可探
癸酉九月廿六日
厭次老子來城南初出城門霜信冷
沙土數尺堆峰嵐
忽聞午鐘蒲牢吼山門赤腳頭陀參
維摩庭院十笏地
獅子倒座羅什慙亭亭二本東西立
西者兌女東震男

秦灰漢壘幾千載鐵皮虬榦何眈眈一如巫枝鑠波底
太陰黑入蛟龍潭一如晉鄙遭朱亥右肩偏袒毛毵毵
一則根生醜婦癭一則枝縮甕繭蠶雷雨垂空礮礮走
脂澤伏窟狶苓甘夕春在瓦西風起鈴鐸乍響天蔚藍
須臾淮陰拔趙幟井陘戰士旌旗酣又如蚩尤排奇陣
鬼兵十萬橫長鎗下有艾納大如掌石牀花掃飛鉢曇
四溟山人何為者詩篇曾不一咀含我今留連不肯去
韋偃莫繪心饒貪安得移雷山薑屋兩手一日摩挲三

乾竺先生視之笑捫蝨且與殘僧談暮歸烏尾訛樓角
寒廳彌勒眠同龕

十二連城歌

國朝 田雯

連城城北十二城村墟草木皆甲兵舊鬼磨滅三百載
天陰雨濕青燐生當時靖難戎馬作旌旗邪掩安陵郭
五十萬師自南來方山之麓捲秋籜燕雲黑壓金川門
齊黃二子徒紛紛濟上猶傳鐵太守白溝空恨李將軍
衰草殘陽長河古鴉陣障天不可數蕎花豆葉爭秋風

平蕪遊落戰場土

高植墓石歌

國朝

田雯

屯氏河厓秋雨塌中有片石鉸文辭殘闕漫漶不易辨
豕亥魚魯多支離曰君諱植字子建魏濟青相司徒兒
豈是曹家瘞舊物官號封削無臨淄淘洗摩挲搜石尾
下紀年月稱神龜拓跋人代越千載六朝荒碣留今茲
渤海蓊人父名肇北魏高氏從可知宣武當年寵外戚
赫赫權勢何恣睢北海彭城遭毒手朝野側目將奚為

一旦馬側車軸折瑤光尼寺同傷悲十八為郎有令子
六州刺史將軍麾銘辭不識何人作或者傳信非傳疑
瓦棺古墓埋朽骨斜陽逝水流空陂此石一落土人手
摩鑱搗練西風吹我行臨河忽三歎河邊古冢青累累
美惡是非不一轍峴首嶧陽各有碑魏收穢史簡編在
考徵僻事方朔饑恨未讀書空涉獵不然幾使冤陳思
長歌題四女祠

國朝
田雯

貝州破廟河之涯古鬼冷守昏鐙斜殘碑牆根泥梵沒

一株禿柳喧啼鴉塑像四女儒巾怪土人香火疑神駟
云是學士宋女宅尚宮逸事今堪誇饒州司馬廷芬父
其母黃媪雙髻了鐘魚晨鼓夜不歇翁婦上坐如官衙
唐書女五祠列四千年休訝傳聞差讀書恥學蛾眉嫁
髻上不挿牽牛花歷事三朝掌圖籍先生官號何清華
訓注之禍憲賜死茱萸少一空咨嗟伊喔牝雞已數唱
柔條娥媚歌聲諱婉兒韶警文章手通天陳迹悲淫哇
女論語成匹七誠較十二字真天邪清陽巾幗擁材傑

世間才子徒紛拏自是詩人延清裔紅裙散落天風葩
豈料當年嘲口臭才歸粉黛馳香車低徊長揖上馬去
祠門社鼓鼕鼕過

蔡中郎八分書遺蹟歌

國朝

趙于京

紛紛龍公賽巷舞先生齋戒因禱雨偶然往檢半截碑
搨得中郎之片羽垂芒八角非荒唐湮滅無從辨今古
君壽何人典贊衛忠謇大節上嘉許江揚劇賊君已清
稼穡滋殖胥樂土五月辛酉何王年此石何因落成武

我疑漢代竹邑侯張君之名魚為魯或與中郎生同時
夏承有道類可睹嗟哉中鑿為凹跌霑牕戈法辱奴豎
間三連五畫腹讀剝蝕安得女媧補大呼韓蘇詩紀之
摩挲未必減石鼓好嵌衣亭北山間不啻淋泠清潄暑

長白山

國朝
李興祖

羣峯插雲雲涵山氣如攢玉山頭園遙天一抹驚遠望
延連四邑雄齊關曲澗層巒步周折疑入綃室揉瑤環
左揮滄海右岱嶽獨挺素色標烟鬟陰晴不變氣全白

可有跨鶴來仙班凌虛直欲接帝座星辰可摘翠岫間
絕壑陰森貯霜雪龍湫漱出聲潺湲瀦水鏡搖落穠艷
春光弄紫晴旭殷高凌天表廣負軸藏靈孕秀石不頑
以茲副嶽擅形勝曾傳漢代玉檢頒赤松難尋白兔杳
惜不杖策時往還東牢大藥如可得聚仙峯頂頻躋攀

謁雙忠祠

費縣

國朝

王式丹

范陽賊兵天下雄挫其鋒者兩顏公常山平原如拍臂
義旗遮蔽山以東西連張許勢犄角牽掣賊肘堪賊胸

藉非哥舒一戰誤豈有火及驪山宮中原瓦裂縱無補
緩賊西上已奇功常山殉國自犁舌魯公爵秩方尊崇
詎意白頭值藍面賊庭洒血留孤忠兩公並是殺身成
仁者傳聞尸解亦鑿空我来此地拜祠宇入門英烈橫
高穹鍾靈孕傑傍沔水千秋兄弟俎豆同靈旗絳節儼
來馭幽沉榱桷迴悲風

秦橋行

國朝 王 革

橋在大海中從日主祠望之怪石嵯峨忽斷忽連

相去丈許如人力為之紛列者蒼茫莫極不知所
屆日主祠在海東岸盡處過祠不復有岸矣

三月海上風怒號天雲下垂天吳驕祖洲瓊田在何許
漭漭東望龜鼉橋崩湍激石色積鐵錯出波面峰嶠峽
近者因依布碁子遠者羅列橫斗杓長鯨悲嘯老蛟舞
馮夸出沒騰靈鼉浪花突墮翻地軸潮勢憑陵傾天瓢
三千年吳畧約在孤島幾經冬華凋於虜祖龍臨渤海
百神秘怪紛來朝神人鞭石恐不速徐市入海甘逋逃

受珠臺空長蒼耳養神芝說同菰苗那及貌寢勿圖我
準蜂膺摯聲豺皐扶桑碧海一萬里鬱儀之居崦嵫遙
高春下春香難即血殷山骨鞭痕銷老我東行事臨眺
春風初合喧春濤一行兩行沙鷗路千松萬松蒼鶻巢
觀碑風雨碎文字殿壁龍蛇昏蠨蛸秦東門刻相斯篆
磨厓漫滅成山椒躊躇平生類蕭瑟自喜真見三峯高
急呼成連如可作朱絃遺音林下交此會曠懷自鹵莽
此地須以匏尊澆作橋未幾祠日主秦時漢時何勞勞

冬花島在橋側
島花經冬始開

過試

國朝
唐芳第

石稜犖确車欲傾黃頭奴子扶輪行綠樹叢中殘月落
青山缺處朝曦生一片白雲恣蕩漾須臾岩壑呈萬狀
當年浪拍出封中山靈大笑層霄上神房遠攝絳節朝
靈風一度松蕭蕭我支短筇凌絕頂霞空縹緲聞仙璫
今來驅車使東去山憐我老留莫住紅桂花繁不寄書
青蛾玉女歸何處荒邈空傳七十君眼前登陟徒紛紛

白頭嬾上東封頌秋雨銷沉碧簡文

常將軍廟歌

將軍名元通

國朝

方正珪

雄關殺氣凝長雲流泉鳴咽寒斜曛一方慕義有公道
高祠瞻拜常將軍將軍昔作五州牧血戰川原陣前沒
又聞築城忤主將屍立崇臺恥雌伏碑銘雨蝕莓苔深
鐵石矢抱平生心不負提攜三尺劍故應鎔鑄雙南金
昭宣迄今幾千載靈爽煥赫尚如在偶然伏莽肆蠢動
踏白軍威宵礪乃君不見封疆呵護憑天人太守夜夢

鬚眉真維新廟貌輝丹漆歲奉椒漿薦白蘋

趵突泉歌

國朝峻德

歷下名泉七十二趵突之名稱獨步舊傳來自王屋山
伏脈岱陰忽仰吐下馬即來探此泉不管城頭天色暮
未到先聞澎湃聲沿牆急轉垂楊路入門驚見湧輪水
眼明如與故人晤白石方池三寶開崩騰晝夜聲不住
一望直驚風雨會半空疑有神靈聚其一噴薄聲勢雄
水電激射雷電怒迤北二竇氣稍殺飛沫翻珠類相附

倒竭龍藏愁老蛟動搖蟾宮濕寒兔陰霏霽靄接湖山
冷翠幽光沾竹樹我時獨往雙清亭心目震蕩神恐怖
昔聞仙翁曾此游紫閣丹房白雲度來鶴橋頭鶴不來
山日沈沈墮蒼霧向晚無人泉自流飛下風標雙白鷺
歸來篝燈坐賦詩雲黑旅窻雨如注



山東通志卷三十五之一上